

卷一

廿二史攷異

漢書

漢書一

廿二史攷異

錢大昕學

高帝紀

羽自立爲西楚霸王王梁楚地九郡 按本紀與項籍

傳俱有王梁楚地九郡之文而九郡之名注家罕能
詳之攷戰國之際楚地最廣羽旣以長沙奉義帝九
江王英布衡山王吳芮南郡王共敖而梁之河內河
東亦不在羽封域之內則羽所有者於秦三十六郡
中實得泗水碭薛會稽四郡而史稱九郡者據當時
分置郡名數之也高帝六年以故東陽郡鄆郡吳郡

五十三縣立荆王以碭郡薛郡郟郡三十六縣立楚

王此二國卽項羽故地然則九郡者泗水也東陽也

東海也

卽郟郡

碭也薛也郟也吳也會稽也東郡也灌

嬰傳度江破吳郡長吳下遂定吳豫章會稽郡

豫章當作

鄣吳王濞傳上患吳會稽輕悍是會稽之外更有吳

郡矣水經注廣陵城楚漢之間爲東陽郡晉志漢武

帝分沛東陽置臨淮郡是楚漢之間有東陽郡也

文穎

云東陽今下邳蓋因後漢改臨淮郡屬下邳國故云非謂卽治下邳也

以故得劫五諸侯兵董教增曰注家說五諸侯者不

一顏氏牽引諸王以足五數於義亦非蓋此處五諸

侯有河南韓魏殷等而項籍傳贊云遂將五諸侯滅

秦又繫何人尋其條貫當据故七國以其地言不以

其王言也漢定三秦卽故秦地項羽王楚卽故楚地

其餘韓趙魏齊燕爲五諸侯劫五諸侯兵猶後言引

天下兵耳故漢伐楚可言五諸侯楚滅秦亦可言五

諸侯也

六年以故東陽郡鄣郡吳郡五十三縣立劉賈爲荆王

以碭郡薛郡郟郡三十六縣立弟文信君交爲楚王

以雲中鴈門代郡五十三縣立兄宜信侯喜爲代王

以膠東膠西臨淄濟北博陽城陽郡七十二縣立子

肥爲齊王 按秦三十六郡無東陽鄣吳郟及膠東
膠西臨淄濟北博陽城陽之名蓋楚漢之際諸侯分
王其地各自立郡非秦之舊膠東濟北項羽所立國
名與齊號爲三齊臨淄卽齊都博陽卽濟北王都也
曹參傳攻破齊歷下軍遂取臨淄還定濟北郡蓋田
榮并三齊之後以濟北爲郡師古以爲史追書之者
非也英布傳九江廬江衡山豫章郡皆屬焉秦時止
有九江郡其餘皆楚漢之際所置謂三十六之外皆
非郡者真契舟求劍之見也楚元王傳王薛郡東海
彭城三十六縣東海卽郟郡紀有碭郡而傳無之攷

地理志梁國故秦碭郡高帝五年爲梁國梁爲彭越
所封楚元不能得之當從傳爲是

十一年立子恢爲梁王子友爲淮陽王罷東郡頗益梁
罷潁川郡頗益淮陽 謂分東郡潁川之支縣以益
二國非廢此二郡也

惠帝紀

元年冬十二月趙隱王如意薨 按班史本紀之例諸
侯王薨書名不書諡惠六年齊王肥呂后二年恆山
王不疑七年燕王建之類是也而惠元年趙隱王如
意文元年楚元王交則兼其諡書之景帝中六年梁

王薨則又失書其名矣又諸侯王生不稱諡高帝紀淮南王梁王趙王楚王朝未央宮是也而惠二年齊悼惠王來朝則生而諡之矣丞相相國薨不書姓惠二年相國何五年相國參景二年丞相嘉武帝太初二年丞相慶是也而文二年丞相陳平四年丞相灌嬰成帝綏和二年丞相翟方進又并其姓書之皆義例之不一也

二年郤陽侯仲薨 列侯薨紀皆不書獨惠帝紀書薨者二人郤陽侯仲高帝之兄以屬尊特書舞陽侯噲或云以呂氏戚屬故書然噲剛直未必黨於呂也

高后紀

元年不疑爲恆山王 按高后紀恆山王三見外戚傳恆山王二見周勃傳恆山一見郊祀志恆山字四見五行志恆雨恆暘恆奧恆寒恆風字屢見亦有易爲常字者

犯文帝諱韋賢傳寔絕我邦我邦旣絕寤其外邦于異他邦犯高帝諱刑法志殺人盈城犯惠帝諱文帝紀夏啓以光武帝紀見夏后啓母石古今人表有漆彫啓犯景帝諱景帝紀省徹侯之國賈誼傳列爲徹侯而居百官公卿表徹侯字兩見犯武帝諱楚元王傳歆以建平元年改名秀犯光武諱高帝紀有莊賈

項莊地理志莊公破西戎藝文志有莊子莊夫子莊
助莊安莊忽奇陳勝傳有莊賈申屠嘉田蚡傳皆有
莊青翟鄭當時傳莊字三見南粵傳莊字一見西南
夷傳莊字三見敘傳莊字一見犯明帝諱
未敢誦言誅之 史記誦作訟韋昭曰訟猶公也

文帝紀

元年故常山丞相蔡兼爲樊侯 丞字衍

三年太尉潁陰侯灌嬰爲丞相 丞相三公除授紀皆

不書文三年太尉潁陰侯灌嬰爲丞相以罷太尉書

也成帝綏和元年以大司馬票騎大將軍衍大字根監本

無根字爲大司馬以罷將軍書也哀帝元壽二年大司

馬衛將軍董賢爲大司馬丞相孔光爲大司徒御史

大夫彭宣爲大司空以正三公官書也成帝初卽位

以元舅侍中衛尉陽平侯王鳳爲大司馬大將軍領

尚書事特書於本紀者著王氏篡國之漸也將相罷

免例不書惟建元二年丞相嬰太尉蚡免元壽二年

大司馬票騎將軍丁明免獨書

後六年河內太守周亞夫爲將軍 按景帝中二年始

改郡守曰太守此太字衍本傳無太字

景帝紀

中二年令諸侯王薨列侯初封及之國大鴻臚奏諡誅策按諡誅死者所用策則初封及之國者所用謂諸侯王薨大鴻臚主奏諡誅列侯初封及之國大鴻臚主奏策也應劭以策爲哀策非是

武帝紀

建元五年平原君薨婦人薨例不書此以外祖母屬尊特書

六年大司農韓安國出會稽當作大農令太初元年始改名大司農也

元光元年海外肅春北發渠搜氏羌徠服晉灼曰王恢

傳

當云韓安國傳

北發月氏可得而臣似國名也臣瓚曰孔

子三朝記云北發渠搜南撫交趾此舉北以南爲對也師古曰北發非國名言北方即可徵發渠搜而臣屬之瓚說近是按大戴禮少閒篇海外肅慎北發

渠搜氏羌來服之文凡四見而南撫交趾僅一見其文又不相屬則非以南北對舉明矣孔子三見哀公爲三朝記七篇今在大戴記卽千乘四代虞戴德誥志小辨用兵少閒七篇也瓚何不攷而妄爲此說乎盧辯注大戴以北發爲北狄地名李善注文選以爲國名與晉灼說同師古解爲徵召之義誤矣朕小顏

之誤亦自有因公孫宏傳載元光五年制詞有北發
渠搜南撫交趾之語明以南北相對訓爲徵召於義
似允然此實制詞之誤平津對策略而不言蓋知其
誤而不欲訟言之耳渠搜西域之國以爲北方亦未
通於地理新序雜事篇亦云北發渠搜南
撫交趾又承武帝制策之誤
於是董仲舒公孫宏等出焉 按平津侯以元光五年
對策擢第一始見任用是歲初徵賢良除博士不合
意而移疾去

六年遣車騎將軍衛青 按是年青自大中大夫爲車
騎將軍元朔五年春青爲大將軍公卿表皆不載車

騎之號其時猶未甚貴大將軍之失書則傳寫脫漏
也

元鼎五年十一月辛巳朔旦冬至 按自是年至太初
元年相距八歲中積二千九百二十二日冬至當在
癸亥不得到甲子再以月法收之得積月九十八又
二十七日有奇冬至當在十一月二十八日未得置
閏於天正前也若用太初之元則辛巳之冬至又後
天一日史家特據當時所頒之朔書之耳律歷志載
元朔六年甲申朔旦冬至乃太初改歷後逆推之當
時未必以爲章首也

六年定西南夷以爲武都牂柯越巂沈黎文山郡 按
文山郡宣帝地節三年省入蜀郡惟沈黎郡紀志不
言何時省併攷後漢書西南夷傳牂都夷者武帝所
開以爲牂都縣元鼎六年以爲沈黎郡天漢四年并
蜀爲西部此可補本紀之闕

元封三年朝鮮斬其王右渠降以其地爲樂浪臨屯元
菟真番郡臣瓚引茂陵書臨屯郡治東曉縣真番郡
治雲縣 按地理志無雲縣東曉則樂浪屬縣也昭
帝紀始元五年罷真番郡王伯厚謂臨屯郡亦始元
五年罷朕班史無之

太初二年御史大夫兒寬卒 御史大夫書卒自寬始
惟元帝紀失書陳萬年卒史闕文也御史大夫卒例
書姓竟寧元年御史大夫延壽卒不書姓亦闕文
後元二年帝崩于五柞宮臣瓚曰帝年十七卽位卽位
五十四年壽七十一 按武帝十六歲卽位明年改
元壽至七十瓚說誤

昭帝紀

元鳳五年罷象郡分屬鬱林牂柯 按武帝開南越置
九郡無象郡之名地理志謂日南卽秦象郡也此乃
云罷象郡豈日南之外別有象郡乎抑所罷者卽日

南罷之未久而復置乎史無文以知之矣

宣帝紀

本始元年德武食邑張晏曰舊關內侯無邑也以蘇武守節外國劉德宗室俊彥故特令食邑 按上文右扶風德在蘇武之前宗正德在武之後此文先德後武則是周德非劉德也蘇武傳稱賜爵關內侯食邑三百戶而劉德傳無食邑之文張說似未可信

元康元年五月復高皇帝功臣絳侯周勃等百三十六人家子孫令奉祭祀世世勿絕其毋嗣者復其次攷功臣表諸功臣之後詔復家者實百二十三人與

紀人數不合或表有脫漏矣表稱元康四年而紀書於元年蓋有司奉詔檢校得實請於朝而復之非一時所易了紀所書者下詔之歲表所書者賜復之歲也

二年冬京兆尹趙廣漢有罪要斬 按廣漢傳事在地節三年相校差三歲又公卿表本始三年潁川太守趙廣漢爲京兆尹六年下獄要斬自本始三年數至地節四年恰是六年校之本傳後一年校之本紀又先二年俱不相合

甘露二年正月立皇子躡爲定陶王九月立皇子宇爲

東平王 按諸侯王表宇躑竝以是年十月乙亥封
與紀異

黃龍元年帝崩于未央宮 諸帝紀書崩之後必書某

月日葬某陵惟宣帝紀不書乃於元帝紀書初元元
年正月辛丑孝宣皇帝葬杜陵以葬在踰年之後也

元帝紀

初元三年四月乙未晦茂陵白鶴館災 按五行志四

月乙未孝武園白鶴館災茂陵卽孝武陵也志不書
晦以三統術推之是歲四月乙酉朔乙未乃月之十
一日非晦日也晦字衍文翼奉傳載此事亦不云晦

贊貢薛韋匡迭爲宰相注貢禹薛廣德韋賢匡衡迭互

而爲丞相也 按元帝時丞相韋元成非韋賢注誤

也漢以御史大夫貳丞相亦稱三公朕史未有稱御

史大夫爲丞相者元帝之世匡韋皆爲丞相貢薛止

於大夫而孟堅槩以宰相目之已非其倫師古注尤

誤蕭望之言吾嘗備位將相以嘗爲御史大夫故也蓋時俗之通稱而孟堅用之

成帝紀

陽朔三年八月丁巳大司馬大將軍王鳳薨 按大司

馬書薨自元狩六年霍去病始其不書姓亦如丞相

例惟陽朔三年大司馬大將軍王鳳永始二年大司

馬車騎將軍王音元延元年大司馬大將軍王商兼書姓

鴻嘉二年六月立中山憲王孫雲客為廣德王 羅願新安志云景十三王傳復立憲王弟孫利鄉侯子雲客是為廣德夷王諸侯王表雲客以懷王從父弟子紹封獨成帝紀載雲客是憲王孫按雲客之祖孝侯安於憲王為弟其父戴侯遂於懷王為從父弟則雲客乃憲王弟孫懷王從父弟子表傳所言是也紀脫一弟字
永始三年徒李譚等五人共格殺竝等皆封為列侯

按功臣表只有李譚稱忠鍾祖訾順四人

綏和元年以大司馬票騎大將軍為大司馬 當云票

騎將軍多一大字

哀帝紀

元壽二年春正月 元壽二字衍文

帝崩于未央宮臣瓚曰帝年二十即位即位六年壽二

十五師古曰即位明年乃改元壽二十六 按哀帝

年三歲嗣定陶王元延四年入朝年十七明年立為

皇太子又明年即位蓋年十九矣踰年改元壽當二

十五

平帝紀

元始二年立江都易王孫盱台侯宮為廣川王 按諸侯王表廣世王宮以易王庶孫盱台侯子紹封又景十三王傳平帝時立建弟盱台侯子宮為廣陵王奉易王後則紀文盱台侯下脫一子字矣廣川廣陵廣世紀表傳互有不同攷廣陵王胥以武帝子封其後絕而更紹至王莽時始廢不容更封它人若廣川國則其時已改為信都以封楚孝王孫景矣未必割其地以封宮也當從表作廣世為是

廣川惠王曾孫倫為廣德王 諸侯王表作揄廣川惠

王傳作瘡

師古音愈

王子侯表中山靖王傳皆作倫

五年春正月祫祭明堂諸侯王二十八人徵助祭 按

是時諸侯王見存者城陽王俚菑川王永河間王尚

魯王閔趙王隱長沙王魯人廣平王廣漢膠東王殷

六安王育真定王楊泗水王靖廣陽王嘉廣陵王守

高密王慎淮陽王續東平王開明中山王成都楚王

紆信都王景廣宗王如意廣世王宮廣德王倫

一作揄

止二十二人在正月以後故不數

梁王音以是年紹封

異姓諸侯王表

譜十八王月而列之 長沙王吳芮漢高所封不在十

八王之數

高后元年初置淮陽國 按魯國本楚地故與楚為一

行呂國本齊地即濟南郡故與齊為一行淮陽與臨江非

一地而同在一行以其皆為楚之分也梁亦項羽故

地漢五年置梁國王彭越與魏同一行以梁本六國

魏地故也呂后七年初置梁國王呂產則與韓同行

殊非其類恐是轉寫之譌

復置常山國 本紀作恆山此避文帝諱追改文云復

置似張耳初封本名恆山王亦後人追改也

諸侯王表

梁分為五師古曰謂梁濟川濟東山陽濟陰也 按山

陽濟陰後為郡濟東即東平國也惟濟川國史不著

其所在予讀水經注引應劭曰濟川今陳畱濟陽縣

是也乃悟陳畱郡即濟川國小顏注失采此文後人

遂莫知濟川所在矣

廣宗王如意 地理志載諸侯王國二十廣宗廣世廣

德三國皆元始二年置而志不書定陶國哀帝時廢

而志亦不書大約以元始元年版籍為斷也續漢志

鉅鹿郡有廣宗縣疑即廣宗國都也成帝鴻嘉二年

嘗以丹陽之黟縣置廣德國未久而廢元始封廣德

王倫當卽其地惟廣世無可攷

廣德靜王掄以惠王曾孫戴王子紹封 羅願曰景十

三王傳立戴王弟襄隄侯子瘡為廣德王王子侯表

亦言倫是襄隄侯聖之子而諸侯王表乃言掄以戴

王子紹封當脫一弟字大斯謂掄與瘡音相近其又

作倫者字形相涉而譌

王子侯表上

管共侯罷軍

管當作管卽濟南郡之管縣也

據水經注徐

廣以滎陽之管城當之非是

臨衆敬侯始昌 下注臨原字似分臨原地置臨衆侯

國也攷地理志琅邪郡只有臨源侯國無所謂臨衆

者史記表亦作臨原則衆當為原之譌或後人校定

當為臨原誤入正文耳

尉文節侯丙

注南郡疑有誤丙為趙敬肅王子封地

不當遠屬南郡

薪處侯嘉

地理志作新處

濕城侯忠師古曰濕音宅合反

濕城卽西河郡之隰

成縣也濕隰字形相涉而譌不當音宅合反史記本

作隰成

皋琅侯遷

按代共王子同時侯者九人離石藺濕成

成即濕土軍皆西河縣名臨河則朔方縣名皋琅千章

亦西河之縣也地理志西河郡有皋琅縣即皋琅代與西河郡近故

代所分侯國多改隸西河表於皋琅下注臨淮字干

章下注平原字臨淮平原與代風馬牛不相及矣表

似失之

衆陵節侯賢 地理志零陵郡有泉陵侯國此作衆陵

誤

虜葭康侯澤師古曰虜音乎葭音工遐反 地理志琅

邪郡有雩段侯國師古曰雩音許于反段音工下反

按雩段即虜葭顏氏各隨其文音之非也

柳裴戴侯道鄭氏曰音即非在肥鄉縣南五里 按地

理志魏郡有即裴侯國此侯為趙敬肅王子趙魏相

去不遠表云東海殆誤

王子侯表下

孝元之世亡王子侯者 元帝子封王者二人定陶中

山各有一子嗣王皆入繼大宗無支子封侯者

號諡姓名 宗室例不書姓姓字衍文然北宋本已然

蘇明允謂王莽偽褒宗室故從異姓例示天子不得

有其同姓此不放其本末而妄為之說也昭宣元成

哀五朝之侯與王莽何與即元始之際王子封侯亦

循故事惟承鄉侯以下二十二人以王孫得封出於
莽之僞褒耳入居攝所封班氏未嘗列於表何故一
例譏之乎

松茲戴侯霸元始五年六月辛丑封 劉貢父謂元始
當爲始元其說是也老蘇謂此卷皆元始之際王莽
僞褒宗室而侯者正由讀此誤本不能校正耳

高惠高后文功臣表

武陽侯蕭則以何孫遺弟紹封 按蕭何傳孝文元年
更封延爲鄼侯薨子遺嗣薨無子文帝復以遺弟則
嗣是則嗣鄼侯之封非武陽也傳又云景帝二年制

詔御史故相國蕭何高皇帝大功臣今其祀絕朕甚
憐之其以武陽縣戶二千封何孫嘉爲列侯蓋則以
罪免之後嘉始別封武陽表以武陽屬之侯則誤矣
地節四年安侯建世以何元孫紹封 宣帝紀作曾孫

誤蕭何傳亦
作元孫

曲成圉侯蟲達位次曰夜侯恆 恆當作垣據史記表
恭侯捷以孝景中五年復封垣則垣當爲大字書於
下一格

敬市侯閭澤赤 敬市當從史記作故市河南郡有故
市縣卽赤所封也閭澤赤水經注作閭澤毋赤

昌武靖信侯單究 史記作單甯

終陵齊侯華毋害 終陵當從史記作絳陽水經注絳

陽蓋在絳澮之陽漢高帝六年封越騎將軍華無害

為侯國 史稱越將水經注
誤增騎軍二字

東茅敬侯劉到 史記作劉釗當從之

到曾孫鮑陽公乘咸師古曰鮑音紂 按鮑从魚同聲

不得有紂音地理志汝南郡鮑陽縣孟康云鮑音紂

紅反正合同聲俗儒不通翻切妄謂鮑有紂音大可

怪也

杜衍嚴侯王翥如淳曰翥音署 卽項籍傳云王翳也

祝阿孝侯高色 高色史記作公孫耳

平州共侯昭涉掉尾 昭涉當作昭沙廣韻沙字下引

作昭沙掉尾以昭沙為複姓

博陽節侯周聚 博陽當作博陽說見史記

穀陽定侯馮谿 建元四年侯偃嗣 按偃無諡又無

薨年其子孫又無嗣爵者當是坐事除免而史闕其

文

景嚴侯王競 孝文十一年侯嬖嗣師古曰嬖音許孕

反 予弟晦之曰師古音非也史記嬖作嫖嫖古文

作嫖漢書多用古文故為嫖字譌為嫖耳當音匹昭

翻

右高后十二人扶柳襄城軹壺關昌平贅其騰外戚恩澤侯表

作昌成表外戚恩澤侯 睡祝茲建陵十一人在恩澤外

戚浚沛信都樂昌東平五人隨父上邳朱虛東牟三

人在王子凡三十一人 按外戚恩澤侯表高后十

人五人隨父凡十五人十人者扶柳襄城軹壺關昌

平贅其滕呂成祝茲建陵也五人隨父者睡侯呂通

東平侯呂屯汶侯呂產功臣表汶作浚皆呂澤子不其侯呂

種漢陽侯呂祿皆呂釋之子也信都侯張俊樂昌侯

張受別隨父敖在功臣表故恩澤侯不復數之也此

表失數不其漢陽而多一沛又別出睡不入隨父之

列與外戚恩澤侯表互異

注師古曰浚音交又音下交反 地理志沛郡有浚縣

史記作郊侯郊與浚同恩澤侯表作汶字形相涉而

譌也小顏於彼注音問略不攷正亦疏

右孝文十人管氏營邱營平陽虛楊邱枋安都平昌武

成白石阜陵安陽陽周東城十四人在王子 按王

子侯表管是一國氏邱是一國營平又是一國此於

氏字下多一營字

景武昭宣元成功臣表

葛繹侯賀延和二年以子敬聲有罪下獄死師古曰延亦征字也 延當作延說文延與征同从正从彡與延長之延从廾者形聲俱別今本作延乃傳寫之誤耳亞谷侯盧賀延和二年坐受衛太子節掠死安道侯揭陽當時延和四年坐殺人棄市東城侯居殷延和三年坐衛太子舉兵謀反要斬無錫侯卯延和四年坐追反虜擅棄兵還贖罪免荻苴侯韓陶延和二年薨開陵侯祿延和三年坐祝詛上要斬程侯商邱成延和二年封海西侯李廣利延和三年擊匈奴兵敗降承父侯續相如延和四年坐祝詛上要斬

又文帝功臣表按道侯韓興延和三年嗣皆延字之譌

右孝景十八人魏其蓋二人在外戚 按外戚恩澤侯

表尚有章武侯竇廣國南皮侯竇彭祖二人

襄城侯桀龍 以史記索隱證之則漢表本作襄武蓋

後人又據史記改爲襄城耳

博望侯張騫 地理志南陽郡有博望侯國卽騫所封

騫以元狩二年失侯宣帝時復以其地封許舜

潦悼侯王援訾注舞陽 按後有潦侯次公亦注舞陽

疑潦潦一地援訾亡後又以封次公也

輝渠忠侯僕朋以校尉從票騎將軍再出擊匈奴得王侯元狩二年二月封 按下文又有輝渠慎侯應庀亦以元狩二年七月封國名相同又同在魯陽小司馬引韋昭說謂僕多所封則作輝渠應它所封則作渾渠二者皆鄉名皆在魯陽宏嗣生于漢末其說當可信孔文祥謂一邑分封二人此出于臆度而小司馬取之何也

義陽侯衛山 漢時侯國有兩義陽衛山以元狩四年封義陽侯傅介子以元鳳四年封義陽侯表俱注在平氏此南陽之義陽也今信陽州師丹傳平帝卽位以厚

邱之中鄉戶二千一百封丹爲義陽侯厚邱屬東海郡故恩澤侯表注東海字此東海之義陽也

杜侯復陸支注重平 史記索隱引漢表在東平此重疑東之譌

瞭侯畢取注南陽 前瞭侯次公下注舞陽此注南陽舞陽縣本隸南陽其實一也史記索隱謂漢表在下邳似誤

湘成侯監居翁注堵陽 前湘成侯敞屠洛下注陽城此又云堵陽攷監居翁封侯在敞堵洛坐酎金失侯之後當是一地而注各異未審其故

輜陽侯江喜 江喜當是江德之譌酷吏傳廢嗇夫江德封輜陽侯公卿表始元六年輜陽侯江德爲太常四年坐廟郎夜飲失火免卽此輜陽侯也褚少孫補史記作潦陽侯江德輜潦字小異而名與公卿表合水經注淇水又東北逕榆陽城北漢昭帝封太常江德爲侯國其二云榆陽者轉寫之譌謂昭帝時封亦誤而其名之爲德不爲喜亦一證也表但書征和二年十一月封不書某年薨闕文也德爲太常坐法免官而侯爵未替故其子仍得嗣侯

六年侯仁嗣 此六年上無所承必有脫文也江德以始元六年拜太常又四年而免史雖未著其薨年然宣帝以後紀元無至六年者則仁之嗣侯當在昭帝元鳳六年矣

丞父侯孫王 丞父卽前承父也丞與承通

孝成五人武陽博陽贊卽贊字騏龍頡開陵樂陵博望樂

成龍安平平阿成鄉紅陽曲陽高平十五人隨父

按成鄉當作成都謂王商也樂成下衍一龍字又新都侯王莽以成帝永始元年封表計隨父諸人不及新都亦誤 安平當作安成謂王崇也

外戚恩澤侯表

樂成敬侯許延壽 褚先生補史記作樂平水經注漯
水又東北逕樂平縣故城東宣帝封許廣漢少弟翁
孫于樂平爲侯國翁孫延壽字也則酈元亦以樂平
爲延壽所封矣予按此表注平氏字平氏縣屬南陽
而地理志南陽郡本有樂成侯國此卽延壽所封分
平氏置者也樂平侯國地理志無之褚表酈注俱不
足信

安成共侯王崇 漢時侯國有兩安成崇以建始元年
封表注汝南字此汝南之安成也王子侯表安城思
侯蒼長沙定王子元光六年封此長沙之安成也彼

表注豫章字蓋安成本長沙縣建爲侯國乃改隸豫

章國除之後仍還長沙也

長沙之安成表作安城

紅陽荒侯王立以皇太后弟封三十年薨 按立與平
阿侯仁皆爲王莽所憚莽遣使迫守令自殺事見元
后及王莽傳表于平阿侯亦云爲莽所殺獨立云薨
不云殺者誤也

右孝哀十三人新成新都平陽營陵德五人隨父凡十
八人 按新都侯王莽成帝末始元年封表於成帝
隨父八人之內已及之此又見於哀帝下誤矣德侯
劉勲以元壽二年紹封見王子侯表營陵侯劉歸生

以劉澤元孫之孫紹封見荆燕吳傳而表不書史之脫漏也又攷成都侯王邑以建平二年紹封汝昌侯傅昌以元壽二年紹封亦當在隨父之例而此表失數之

百官公卿表上

易敘宓義神農 宓當作處處與伏同與宓字形聲俱別

太初元年夏名光祿勳

胡廣漢官注勳猶闔也主殿

宮門戶之職

衛尉掌宮門衛屯戶

按宮門者未央宮門也武帝時

李廣爲未央衛尉程不識爲長樂衛尉表有廣無不識宣帝時霍光長女壻鄧廣漢爲長樂衛尉女壻范明友爲度遼將軍未央衛尉表有明友無廣漢知表所載惟未央衛尉也未央長樂二尉分主東西宮孟康云李廣爲東宮程不識爲西宮予謂長樂宮太后所居太后朝稱東朝似長樂在未央之東矣未央衛尉諸傳皆單稱衛尉獨李廣范明友稱未央者以別於長樂也韋元成傳亦稱未央衛尉則以其時始置建章衛尉故亦稱未央以別之

長樂建章甘泉衛尉皆掌其宮不常置 宣帝紀元康

元年置建章衛尉元帝紀初元三年罷甘泉建章宮
衛令就農

凡縣道國邑千五百八十七按地理志縣邑千三百一十四道三十二侯國二百四十一合之恰符千五百八十七之數然以每郡國所領縣計之止千有五
百七十八蓋史文有脫漏也

百官公卿表下

孝景中三年煮棗侯乘昌為奉常按功臣表煮棗端

侯革朱史記作靖侯赤不書姓孫昌以孝景中二年嗣侯即此

乘昌也一人而姓互異廣韻乘姓引煮棗侯乘昌革姓引煮棗侯革朱

中五年軟侯吳利為奉常按功臣表軟侯黎朱蒼孝

惠二年以長沙相侯傅子孝侯豨孫彭祖至曾孫扶

失侯則孝武元封元年事也黎朱蒼史記作利蒼別

無所謂軟侯吳利者

孝武建元二年郎中令石建六年卒按萬石君傳建

以建元二年為郎中令元朔六年卒前後凡十六年

表蓋脫十字又李廣傳稱廣代石建為郎中令攷廣

由右北平太守拜郎中令正在元朔六年可證建任

郎中令寔十六年而非六年矣

三年內史石徧徧當作慶

元光四年寧平侯張歐爲太常 此與御史大夫張歐各是一人攷功臣表未見有封寧平侯者惟宣平侯張敖之孫哀侯歐以孝文十六年嗣侯然亦薨于景帝時不及仕孝武朝也又據史記表歐乃嗣封南宮侯寔非宣平則與此表之張歐亦斷非一人矣此條疑有誤

元狩三年廷尉安 蓋司馬安也汲黯傳稱安以文深巧四至九卿以表攷之元狩元年有中尉司馬安五年有廷尉司馬安并此爲三矣六年俞侯樂賁 當作樂賁樂布子也

元鼎四年睢陵侯張廣國爲太常 功臣表作廣孫蓋張敖之曾孫也

征和四年繆侯酈終根爲太常十一年坐祝詛誅 按終根官太常不過二三年此十一年蓋三字之譌也功臣表終根以元鼎二年嗣侯二十九年後二年祝詛上要斬可證十一年必爲三年之譌矣

孝昭元鳳元年光祿勳并右將軍 表云并者一人兼兩職非不置此官也霍光廢昌邑王時羣臣連名奏上皇太后九卿中獨無衛尉光祿勳京兆尹名攷其時張安世以車騎將軍兼光祿勳范明友以度遼將

軍兼衛尉列將軍位在九卿之右故舉其尊者書之
趙廣漢以京輔都尉守京兆尹未正授故但稱都尉
而敘於馮翊扶風之後

孝宣地節三年執金吾延年 按武五子傳臣敞故知
執金吾嚴延年字長孫女羅紉前爲故王妻此延年
當卽嚴延年也酷吏傳嚴延年字次卿官至河南太
守此別是一人

黃龍元年太子太傅蕭望之爲前將軍一年爲光祿勳
二年免 按望之以前將軍兼光祿勳在元帝卽位
以後本傳云宣帝寢疾拜望之爲前將軍光祿勳受

遺詔輔政蓋因拜將軍而牽連及之耳

孝元初元五年河南太守劉彭祖爲左馮翊二年遷太
子太傅 劉當作嚴嚴彭祖卽傳公羊春秋者

永光二年右扶風鄭宏爲御史大夫五年有臯自殺
按本傳及京房傳但云坐與京房議論免爲庶人不
云自殺且大臣有臯自殺例書於本紀今紀不書疑
表誤

建昭元年尙書令五鹿充宗爲少府五年貶爲元菟太
守 按儒林傳梁邱臨代五鹿充宗爲少府據表則
代充宗者乃召信臣非梁邱臨也又張禹傳弟子有

少府戴崇儒林傳林尊張山拊琅邪王中淄川任公
俱爲少府王尊傳尊子伯亦爲京兆尹敘傳班伯爲
水衡都尉外戚傳有宗正劉長樂執金吾劉敢表皆
未見

竟寧元年安年侯王章子然爲執金吾 安年當作安
平章蓋卽成太后兄王舜之子與京兆尹王章非一
人

孝成建始二年弋陽侯任千秋長伯爲執金吾 公卿
表中書名不書姓者史之闕文也書名而兼及字與
郡者以其人無傳故附見於表若傳已見字者例不

更書惟綏和二年太子中庶子傅喜穉游爲衛尉穉
游字已見本傳而表復書疑後人所加也一人而表
中再三見者於最初書字與郡後不更書惟初元四
年書弋陽侯任千秋長伯爲太常而建始二年又書
弋陽侯任千秋長伯爲執金吾疑亦後人所加

河平三年右曹光祿大夫辛慶忌爲執金吾四年貶爲
雲中太守 按慶忌傳初爲執金吾坐子殺趙氏左
遷酒泉太守歲餘以大將軍王鳳薦復徵爲執金吾
數年坐小法免左遷雲中太守則慶忌再爲執金吾
而再左遷也表誤合兩任爲一

鴻嘉元年平喜侯史中爲太常六月病免 史氏無封
平喜者當是平臺侯史恁也

元延二年廣漢太守孫實爲京兆尹一年免 實當作
寶一年當爲三年

綏和元年長信少府薛宣爲京兆尹一年貶爲淮陽相
按薛宣傳宣自罷相之後復爲特進給事中視尙
書事坐善定陵侯淳于長罷未嘗爲長信少府京兆
尹也淳于長之誅在綏和元年宣方連坐免官無緣
復拜京兆表所載由長信少府遷京兆尹者蓋宣之
弟修也傳稱修歷郡守京兆尹少府不云長信者脫

文耳鮑宣傳郭欽哀帝時爲丞相司直奏免京兆尹
薛修等攷哀帝以綏和二年四月卽位修官京兆在
綏和元年閏一年貶正當哀帝時

太僕宏爲執金吾 當云任宏脫任字

南陽謝堯長平一年遷 長平下當有爲執金吾四字
二年衛尉王龔爲侍中光祿勳二年貶爲恒農坐呂寬
自殺 恒農下脫太守二字呂寬事見王莽傳在元
始三年距是歲七年矣

孝哀建平三年右將軍公孫祿爲左將軍一年免 按
何武傳哀帝崩武爲前將軍與左將軍公孫祿相善

武舉公孫祿可大司馬而祿亦舉武有司劾奏武祿
互相稱舉皆免事在元壽三年距建平三年實四歲
矣此云一年免誤

孝平元始二年中郎將幸成子淵爲水衡都尉 幸成
當是辛茂之譌辛慶忌少子也

三年執金吾長安王駿君公 此別是一人非成帝時
王駿也

古今人表

師古曰但次古人而不表今人者其書未畢故也 予
謂今人不可表表古人以爲今人之鑒俾知貴賤止

乎一時賢否著乎萬世失德者雖貴必黜修善者雖
賤猶榮後有作者繼此而表之雖百世可知也觀孟
堅序但云究極經傳總備古今之畧要初不云褒貶
當代則知此表首尾完具小顏所云蓋未喻孟堅之
旨

桀紂龍逢比干欲與之爲善則誅于莘崇侯與之爲惡
則行可與爲惡不可與爲善是謂下愚 依此文桀
紂當竝列九等今表以紂與妲己飛廉惡來列九等
而桀與末喜于莘乃在八等又失載崇侯名皆轉寫
之譌脫也

注張晏曰老子元默仲尼所師雖不在聖要為大賢而在第四今本老子有列於第一格者蓋唐人判定本舊唐書禮儀志天寶元年二月丙申詔史記古今人表元元皇帝昇入上聖正謂此也史記當作漢書南監本老子在第四格鄰子之後此班氏元本

田單以卽墨孤城復強齊之大魯連之博通忽於榮利藺子申威秦王退讓廉頗乃在第五今本魯仲連藺相如在第二格田單在第四格又據張晏說寺人孟子在第三今本在第四格晏又譏嫪毐上烝昏亂惡不忍聞乃在第七今本不列毒名蓋後人妄以已

見升降出入不皆班氏之舊矣

大昊帝宓羲氏上上宓當作處

列山氏上中禮記祭法作厲山氏鄭康成韋曜皆以

為炎帝之號表以炎帝神農氏列第一等列山氏列

第二等

帥味上中按左氏傳金天氏有裔子曰昧為元冥師

生允格臺駘此作帥味字形相近而譌

廖叔安上中師古曰左氏傳作戮左傳作颺此云戮

誤

柏奮上中伯仲之伯漢表多作柏柏奮柏虎柏譽伯

與柏益柏封叔逢公柏陵柏樂皆是

雒陶 上下 廣韻作雄陶

續身 上下 廣韻作續牙

朱斯 上中 卽及斯

逢門子 下中 孟子作逢蒙蒙門聲相近

雅俊 下中 墨子作推俊

孟獻 中上 益後 秦本紀作孟戲戲獻聲相近

劉姓豕韋 中上 左氏傳陶唐氏既衰其後有劉累學

擾龍于豢龍氏以事孔甲夏后嘉之賜氏曰御龍以
豎豕韋之後杜預云以劉累代彭姓之豕韋累尋遷

魯縣豕韋復國至商而滅累之後世復承其國為豕

韋氏此表前有豕韋與大彭竝列第三等者彭姓之

豕韋也 國語大彭豕韋為商伯又云彭姓彭祖豕韋則商滅之矣 此豕韋乃劉彘

之後范宣子云句之祖在商為豕韋氏者也故言劉

姓以別之

馮辛 中下 史記作廩辛

秦女妨 中下 史記作女防

孟會 中下 秦本紀作孟增會蓋增之譌後文亦作孟

增

秦大雒 中中 大乙子 秦本紀作大駱駱雒古字通大

乙則大几之譌

楚熊盤 中中 艾子 按楚世家熊艾生熊黜 表作 熊黜

生熊勝熊勝以弟熊楊為後鄒誕生本楊作錫又作
煬表所載熊盤即世家之熊勝也世家以為艾孫表
以為艾子表又以熊錫為盤子皆與世家異

楚摯紅 中下 渠子 表於摯紅熊摯皆云渠子而無熊

渠名蓋傳寫脫之

懿王堅 下中 周本紀堅作轄音相近

夷王摺 中下 周本紀摺作燮

楚熊紉 中下 楚世家作季徇

司徒皮 下下 師古曰詩所謂蕃為司徒是也 蕃音婆

古讀皮如婆

楚甯敖 下上 楚世家作霄敖

司空牛父 下上 左氏傳作司寇

公子穀生 下上 左氏傳作穀甥

秦憲公 中下 文公子 秦本紀文公子靖公靖公子寧

公與表異

魯公孫隱 中下 即左氏傳公子偃也偃隱聲相近徐

偃王表作隱王

石奩 中下 據左氏傳石奩與良霄使楚在鄭簡公之

世不與鄭繆公同時其謀納繆公者石癸也僖三十年傳有石甲父疑與癸一人表別有石癸則以此石奠當甲父矣

夏父不忌 下上 左氏傳作弗忌古讀弗如不

五參 中上 五古伍字

曹剗時 上下 師古曰即曹欣時也 欣剗聲相近左氏

作喜時

屠顏賈 下下 師古曰即屠岸賈也 岸顏聲相近

叔山舟 中中 左氏傳作舟

國佐 下中 據左氏傳國佐即賓媚人表以賓媚人列

第四等國佐列第八等

鄭卑湛 中上 即裨湛

衛公子逞 中上 即左氏傳公子郢也

大夫選 中中 即論語大夫僎

榮聲期 中中 師古曰即榮啓期也 聲當為罄之譌啓

罄聲相近

諸稽到 中上 即諸稽郢也郢與到字形相涉而譌

孔文子 下上 即仲叔圉也表以中叔圉列第四等孔

文子列第七等

石國 下下 國當作圃

離朱 中中

即離婁也表列於公輸般之後則以朱為

春秋時人

陳太宰喜 中中

禮記檀弓篇所謂太宰嚭也吳太宰

伯嚭宅書亦作帛喜

我子 中上

我子以下四人皆墨翟弟子

荀薪 中上

趙世家作荀欣

秦簡公 中中

厲公子 秦本紀以為懷公子

顏敢 中上

即孟子書所謂顏般也般敢字形相似

王慎 中上

孟子作王順

大成午 中中

趙世家成侯三年大戊午為相徐廣曰

戊一作成

公仲用 中中

即韓之公仲朋也朋作用傳寫之譌

王升 中上

戰國策所謂先生王斗也斗古文作升與

升往往相亂

捷子 中中

捷即接字史記孟子傳接子齊人學黃老

道德之術者是也藝文志道家有捷子二篇齊人武

帝時說蓋即此捷子其云武帝時說則轉寫訛錯耳

安陸君 中中

此與唐睢並列當即戰國策所謂安陸

君也

高漸離 中上

荆軻 中中 秦武陽 中下

按劉知幾譏班

表云其敘晉文之臣佐也舟之僑爲上陽處父次之
士會爲下其述燕丹之賓客也高漸離居首荆軻亞
之秦武陽居末自注云舟之僑在第三等陽處父在
第四等士會在第五等高漸離在第五等荆軻在第
六等秦武陽在第七等今本陽處父與舟之僑俱在
第三士會高漸離在第四荆軻在第五秦武陽在第
六又知幾稱鄧侯入下愚之上第七等三甥列在中庸
下流第六等今本鄧祁侯在第六騅甥明甥養甥在第
五俱與劉氏所說異蓋轉寫訛舛失其本真當以劉
所見本爲正也

漢書二

廿二史攷異

錢大昕學

律歷志上

徵祉也 徵祉聲相近故徵有祉音

林君也 釋詁文

應鐘言陰氣應亡射該滅萬物而雜陽闕種也孟康曰
陰雜陽氣臧塞爲萬物作種也 按應鐘十月之律
于消息爲純陰卦而八卦之位乾在十月是爲陰雜
陽氣也坤之上六云龍戰于野其血元黃而文言傳
以爲天地之雜莊氏謂上六之爻兼有天地雜氣故

血有天地之色

三十斤爲鈞四鈞爲石忖爲十八易十有八變之象也
孟康曰忖度也度其義有十八也黃鐘龠銖兩鈞斤
石凡七與下十一象爲十八也 按孟說非也一鈞
重萬一千五百二十銖以易六十四卦之數除之得
一十有八合於易之十八變而成卦也

迺以前歷上元秦初四千六百一十七歲至于元封七
年復得闕逢攝提格之歲中冬十一月甲子朔旦冬
至日月在建星太歲在子 按太初元年太歲在丙
子東漢以後術家不知太歲有超辰之法上溯太初

之元以爲丁丑非太初本法也其二云闕逢攝提格之
歲者謂是年歲陰在甲寅也歲陰與太歲皆百四十
四歲而超一辰故四千六百一十七歲而復其初秦
漢之間多以歲陰紀歲淮南子言太陰在寅名曰攝
提格史記貨殖傳太陰在卯之類是也東漢始專用
太歲而去其超辰之法故於此文多不了了唐一行
日度議云漢太初元起丁丑推而上之不值甲寅猶
以日月五緯復得上元本星度故命曰闕逢攝提格
之歲而實非甲寅此亦強作解事語觀太初詔書固
云年名焉逢攝提格矣安得云實非甲寅乎 劉攽

云十七歲當作十一歲此亦妄說二劉於推步本無所解宋子京所引景本亦無一不誤今不復辨也又妄言太初歷虧四分日之三去小餘七百五分按黃帝六家之術大畧皆與四分同四分以九百四十為日法九百四十之七百五正四分之三也則壽王術日法亦同四分矣

參閏法為周至以乘月法以減申法而約之則六劫之數為一月之閏法其餘七分此論中月相求之理也周至五十七以乘月法得十三萬六千三百四十四與中法十四萬五百二十相減餘四千一百八十

六是為一月之閏法蓋中法以滿元法四千六百為

一日置中法以元法除之得三十日又四千六百一十七分之二十也以周至乘

月法則亦以滿元法為一日置十三萬六千三百四十四以元法除之得二

十九日又四千六百一十七分之二十也兩數相減之餘四百五十一即八十一之四十三也

即中多於朔之數而為一月之閏分也六劫當作七

劫置四千一百八十六數以通法除之得七而通法

又即一劫之數月法二千三百九十二為再劫兩之數則通法五百九十八者一劫之

也數則一月之閏法為七劫之數矣歲有閏餘十九分

之七析之則每月有閏餘二百二十八分之七也

易九尾曰初入元百六陽九次三百七十四陰九孟康

曰易傳也所謂陽九之厄百六之會也 按九厄當作无妄易雜卦傳无妄災也京房說无妄以爲大旱之卦萬物皆死無所復望應劭云天必先雲而後雷雷而後雨今無雲而雷无妄者无所望也萬物無所望于天災異之最大者也漢儒引伸其義故有陽九陰九經歲災歲之說此亦緯書之類孟康以爲易傳猶稽覽圖稱中孚傳也谷永傳遭无妄之卦運直百六之災阨論衡明雩篇云災變大抵有二有政治之災有無妄之變德豐政得災猶至者無妄也德衰政失變應來者政治也又云無妄之氣歷世時至又云

非常之變無妄之氣閒而至也水氣閒堯旱氣閒湯恢國篇云建初孟年無妄氣至須頌篇云成湯加成宣王言宣無妄之災不能虧政寒溫篇云按易無妄之應水旱之至自有期節三國志注公孫淵上孫權表伏惟遭天地反易遇無妄之運劉淵林注吳都賦引漢書此條正作易无妄可證魏晉時本尙未誤李善注文選屢引此文竝作陽九厄則唐時已譌不始於近代矣无妄譌爲九厄蓋字形相涉或并改易爲易以傳會陽九之文不知水旱之災陽不必九九不獨陽也

凡十二次日至其初爲節至其中斗建下爲十二辰
斗建上當有爲中二字蔡邕月令章句周天三百六
十五度四分度之一分爲十二次日至其初爲節至
其中爲中氣

孟仲季迭用事爲統首 寅申巳亥爲四孟子午卯酉
爲四仲丑未辰戌爲四季故甲申曰孟統甲子曰仲
統甲辰曰季統淮南天文訓木生于亥壯于卯死于
未火生于寅壯于午死于戌金生于巳壯于酉死于
丑水生于申壯于子死于辰孟仲季之序蓋因于此
律歷志下

積中七中餘千七百一十八 當云積中十

東九西七乘歲數并九七爲法得一 金水晨夕歲數

金水晨見伏在東方夕見伏在西方約其率則晨見
十六分之九夕見十六分之七故以十六爲總法以
九乘歲數十六除之得晨歲數七乘歲數十六除之
得夕歲數也

壹見三百九十八日五百一十六萬三千一百二分劉
敞曰三百九十八日五百一十六萬三千一百二分
者通計上文見伏之日分也今作壹見字疑後人妄
改之 按木土火稱一見者以見統伏也金水稱一

復者以復該晨夕也上文見中法下分注見數復數其義已明此下又有推五星見復之術劉氏俱未檢照輒疑後人妄改甚違蓋闕之義

日行四十六分度四十三 四十三當作三十三
日行三分度一六日而伏 三分當作二分

壹復五百八十四日百二十九萬五千三百五十二分

劉敞曰此又妄改爲壹復自是通計晨夕見伏之日分也 說見上

百三十七日千七百一十七萬一百七十分 土星伏
三十七日有奇上百字衍

伏日行不盈九十二分度七十三分 下分字衍

十七日順疾 十字衍

盈元法除之餘不盈統者 統當作元

以章月乘人統歲數 人當作入

以十二乘閏餘加十得一 加十當作加七

以算餘乘人統歲數 算當作策人當作入

求八節加大餘四十五小餘千一百林文炳曰當作小

餘千一十 林說是

求二十四氣三其小餘加大餘十五小餘千一十林文

炳曰當云加大餘十五三分其小餘千一十 按林

說非也千一十之數三分之則有畸零不可入算故
三倍其小餘本以統法爲日法今以元法爲日法也
上云千一十者一千五百三十九分日之餘此云千
一十者四千六百一十七分日之餘

推中部二十四氣皆以元爲法 部疑節之譌

所得起其正算外則食月也 其當作天

盈見中法得一則積中法也 下法字衍

不盈者名曰月中餘 中字衍

中次至日數次以次初數 中次之次當作以

加後餘于中餘 後下當有中字

數如法則見中也 數下當有除字則下當有後字

推至日及入中次度數如上法 次下當有日字

推朔日及入月數如上法 月下當有日字

以六十除餘積次 餘字衍

算盡之外則太歲日也 日字誤當云太歲所在

六物者歲時數日月星辰也 數字衍

斗二十六 此下當有三百八十五分六字賈逵云太

初歷斗二十六度三百八十五分姜岌云三統以一

千五百三十九分之三百八十五爲斗分蓋周天以

牽牛起算終於南斗二十六度所有零分歸於斗度

之末故曰斗分此斗分字當是分注後人傳寫失之
北九十八度 此下亦當有三百八十五分六字

四分上元至伐桀十三萬二千一百一十三歲 按四
分之術至後漢始行今劉子駿三統術亦著其說則
西京已有之矣淮南天文訓所述甲寅元亦與四分
同

壬辰農星始見師古曰農古晨字也其字從臼臼音居
玉切 按說文晨晨二字有別晨夕字从臼晨爲房
星从晶當作農或作晨省文也此晨星者水星也亦
从臼

丙午還師 還當作逮

世家煬公卽位十六年 汲古閣本作六十年是也史

記魯世家煬公六年卒六下亦脫十字

是歲距上元十四萬二千五百七十七歲 按自上元

盡僖公五年得十四萬二千五百七十七歲凡言距
算者皆外所求則七十七歲當作七十六歲

王莽居攝盜襲帝位 自此以下皆班氏所增入非劉
歆本文上文初元元年距建武七十六歲亦班氏增
入也

改元曰建武歲在鶉尾之張度 按光武建武元年距

上元十四萬三千二百五十五歲滿歲星歲數去之
歲餘一千五百五十九以百四十五乘之得二十二
萬六千五十五滿百四十四而一得積次一千五百
六十九次餘百以十二除積次餘數九從星紀起算
外則歲在壽星也又以六十除積次餘數亦九從丙
子起算外則太歲在乙酉也志云歲在鶉尾之張度
者蓋以太初元年歲在星紀距是歲一百二十八算
未盈超辰之限故約畧計之以爲當在鶉尾耳若以
密率求之則太初改元歲星在婺女六度已是星紀
之末歲星每年多行一分至太始二年歲星已度壽

星而入大火卽太歲亦超乙酉而在丙戌矣王莽傳
建國五年歲在壽星倉龍癸酉八年歲躔星紀天鳳
七年歲在大梁倉龍庚辰厥明年歲在實沈倉龍辛
巳據此推至光武建武元年正當在壽星之次此實
算也翼奉以元帝初元二年前上封事云今年太陰建
于甲戌此太陰卽謂太歲

禮樂志

後董仲舒對策言王者欲有所爲宜求其端於天 按
仲舒對策已見本傳而志復載其文至四百言王吉
疏已見本傳而志復載其文至百五十餘言司馬遷

言李陵事已見遷傳而陵傳又載其文百五十言元
帝初元二年地震下詔已見本傳而翼奉傳又載其
全文

沸俞甚而無益 俞古愈字

是故纖微瘳瘁之音作注瘳一作衰 樂記作志微噍
殺之音鄭氏解志微爲意細似曲當依此文作纖纖
與識字形相涉而志又識之古文遂譌爲志耳衰殺
聲相近較之瘳字爲長

以營亂富貴之耳目 營與熒通營亂猶惑亂也師古
訓回繞似非

建始元年丞相匡衡奏 能鸞路龍鱗 戛定詩曰涓選休
成 按志云奏罷者謂去鸞路句改爲涓選休成也
下章云奏罷黼黻周張 戛定詩曰肅若舊典亦謂去
黼黻句改爲肅若舊典也郊祀志成帝初卽位丞相
衡等奏定南北郊又言甘泉泰畤紫壇有文章采鏤
黼黻之飾石壇仙人祠瘳鸞路駢駒寓龍馬不能得
其象于古宜皆勿修故戛云鸞路龍鱗黼黻周張二
語其餘仍用舊文也監本以涓選休成句屬天地章
以肅若舊典句屬日出入章此誤之甚者然文獻通
攷載元豐六年判太常寺陳薦議引郊祀歌涓選休

成天地竝況證天地合祭之說則北宋本已誤矣

刑法志

孝文二年左右丞相周勃陳平奏言 按公卿表孝文

元年十月右丞相陳平爲左丞相太尉周勃爲右丞相八月勃免平獨爲丞相二年十月丞相平薨十一月勃復爲丞相是平勃同爲丞相在元年非二年也文帝紀元年十二月除收帑相坐律正平勃竝相之時志云二年誤

食貨志上

爍木爲耒宋祁曰爍木當爲揉木 按說文爍屈申木

也揉字說文不收當以爍爲正史漢多古字率爲校書人妄改子京猶不免爾何況餘子

三歲更耕之自爰其處 按春秋傳晉於是乎作爰田服虔孔晁皆云爰易也說文爰作𠄎𠄎田易居也張湯傳傳爰書師古訓爰爲換換與易同義

還廬樹桑師古曰還繞也 還與環同

其詩曰有滄淒淒興雲祁祁 按韓詩外傳引詩亦作興雲祁祁漢無極山碑亦有興雲祁祁雨我公田遂及我私之文蓋漢世經師傳授皆然顏之推家訓云詩有滄萋萋興雲祁祁毛傳滄陰雲貌萋萋雲行貌

滄已。是陰雲何勞復云興雲雲當爲雨俗寫誤爾班固靈臺詩云習習祥風祁祁甘雨此其證也之推仕南北朝雖疑雲爲誤字不聞据他本以正之則六朝本亦皆作興雲矣大雅韓奕篇云祁祁如雲可證祁祁爲雲行貌非轉寫之誤後漢書左雄傳作興雨祁祁或後人校改

大命將泛孟康曰泛音方勇反宋祁曰勇當作濫按方勇卽泛之轉聲說文風从凡聲而汎亦有馮音今人呼帆爲篷亦聲之轉也宋子京不知古音故疑其誤

民俞勤農

俞古愈字下文貧弱俞困民俞貧困之俞

竝同

食貨志下

孔僅使天下鑄作器三年中至大司農列於九卿而桑羊爲大司農中丞管諸會計事按百官公卿表大農令太初元年更名大司農此孔僅爲大農令在元鼎二年尙無大司農之名也史記平準書無司字桑羊稱大農丞不云中丞得之

郊祀志上

後四年秦宣公作密畤于渭南

史記作六年誤

設射不來不來者諸侯之不來朝者也 史記云設射
狸首狸首者諸侯之不來者按禮記射義諸侯以狸
首爲節狸首者樂會時也大射儀奏狸首鄭康成云
狸之言不來也其詩有射諸侯首不朝者之言因以
名篇攷工記祭侯之辭曰毋或若女不寧侯不屬於
王所故抗而射女不屬者不來朝會也萇宏所行乃
是古禮戰國後禮廢乃疑其神怪爾

四曰陰主祠三山師古曰三山卽下所謂三神山 按
小司馬引顧氏說東萊曲成有參山卽此三山者是
也師古注誤

冬塞禱祠 塞古賽字史記作賽說文無賽字當依班
志下竝同

至中山晏溫如淳曰三輔謂日出清濟爲晏 說文晏
天清也濟與霽同洪範曰雨曰霽史記作濟

皆嘗鷓亨上帝鬼神師古曰鷓亨一也韓詩采蘋曰于
以鷓之唯錡及釜亨音普庚反 鷓湘聲相近亨讀
如享服虔云以享祀上帝也師古讀如烹非
受此書申公 下云申公齊人則非魯之申培公蓋別
是一人

郊祀志下

十二年廼下詔曰 元康四年宣帝卽位之十二年也
又祠太室山于卽墨 地理志膠東卽墨縣有天室山
祠此云太室疑誤

三戶山于下密 地理志下密縣有三石山祠汲古閣本作台

水經注引地理志亦作石

又祠參山八神于曲城 地理志作曲成參山卽三山
八神之一

蓬山石社石鼓于臨朐注地理志蓬山作達山 按地
理志臨朐縣有蓬山祠注誤蓬爲達

皆罷候神 候神二字當屬下句謂候神之方士使者

副佐也

天文志

東井西曲星曰戊 戊古鉞字史記作鉞俗本譌爲戊
三星若合是謂驚立絕行 立古位字下文作驚位可

證

積薪在北戌西北積水在北戌東北 戌當作戊

元封中星孛于河戌占曰南戌爲越門北戌爲胡門

按天官書朝鮮之拔星弗于河戒小司馬引天文志
元封之中星孛于河戒其占曰南戒爲越門北戒爲
胡門是戌爲戒之譌也唐一行言天下山河之象存

乎兩戒亦引星傳北戒爲胡門南戒爲越門之文
五行志上

次二曰羞用五事注羞進也 按古文敬作苟與羞相
似羞疑敬之譌也又攷藝文志引書云初一日五行
次二曰羞用五事言進用五事以順五行也五行藝
文二志皆取劉歆之說則歆所傳尙書本是羞字孔
光對日蝕事亦引書羞用五事

劉向治穀梁春秋數其甌福傳以洪範注以洪範義傳
而說之傳字或作傳讀曰附 予謂或說是也

傳載眡孟夏侯勝京房谷永李尋之徒所陳行事 傳

亦當爲傳讀曰附言以仲舒向歆爲主而附載眡孟
諸人說也

建元六年六月丁酉遼東高廟災 武帝紀作二月乙
未

建始元年正月乙丑皇考廟災 成帝紀皇曾祖悼考
廟災此有脫文

五行志中之上

思曰容應劭曰容通也古文作睿 按伏生傳本作容
董生春秋繁露述五行五事云思曰容容者言無不
容又云容作聖聖者設也王者心寬大無不容則聖

能施設事各得其宜也此志說思心之不容云容寬也孔子曰居上不寬吾何以觀之哉言上不寬大包容臣下則不能居聖位則爲包容之容非睿智字明矣容與恭從聰爲韻鄭氏破容爲睿於義爲短今漢書刊本作容非容非睿亦失班志之舊

霧恆風若 霧蒙聲相近

史記成公十六年公會諸侯于周注此志凡稱史記者皆謂司馬遷所撰也 按此條引單襄公見晉厲公視遠步高事見國語而太史公書無之此外所引史記如單襄公見晉三郤齊國佐一條晉惠公時童謠

一條穀洛水鬪將毀王宮一條周三川震伯陽甫言周將亡一條夏后氏之衰二龍止于夏廷一條季桓子穿井得土缶一條隼集陳廷楛矢貫之石罍一條皆國語之文惟夏后二龍伯陽甫事見周本紀土缶楛矢事見孔子世家餘皆無之又戰國及秦事志稱史記者間與太史公書合而秦昭王三十四年渭水赤始皇二十六年有大人長五丈見于臨洮二世元年天無雲而雷今史記亦無之則班志所云史記非專指太史公書矣古者列國之史俱稱史記周本紀云太史伯陽讀史記陳杞世家云孔子讀史記而漢

書藝文志稱仲尼以魯周公之國史官有法故與左邱明觀其史記據行事仍人道因興以立功就敗以成罰有所褒諱貶損不可盡見口授弟子邱明恐弟子各安其意以失其真故論本事而作傳明夫子不以空言說經也然則邱明所論次者謂之春秋傳國語乃左氏所錄史記舊文故亦可稱史記劉知幾以班志所引不云國語惟稱史記訾其忘本徇末逐近棄遠蓋未識此旨也史遷著書未嘗以史記名之卽孟堅亦未嘗以史記目太史公書小顏攷之未詳爾能者養之以福注之往也能養生者則定禮義威儀自

致於福 按律歷志引此文作養以之福師古訓之爲往之福與取禍相對此志亦當然後人据今本左傳改之與注意不合

匪傲匪傲 詩作彼交匪敖春秋傳作匪交匪敖古書彼與匪通詩彼交匪紆荀子勸學篇作匪交匪紆左傳引詩如匪行邁謀杜預云匪彼也

雷以二月出其卦曰豫以八月入其卦曰歸妹 按孟喜卦氣圖豫二月卦歸妹八月卦

遠哉搖搖 春秋傳作遙遙說文無遙字當从漢志五行志中之下

劉向以爲殷道既衰高宗承微而起盡涼陰之哀天下
應之既獲顯榮怠于政事國將危亡故桑穀之異見
注桑穀自太戊時生涼陰乃高宗之事而此云桑穀
卽高宗時出其說與尙書大傳不同或者伏生差謬
此自劉向差謬非伏生誤也郊祀志亦以桑穀爲
太戊事

五行志下之上

於易巽爲風爲木卦在三月四月 易乾鑿度巽位在
四月又云巽漸三月蓋立夏巽始用事在三月四月
之間

秦孝文王五年旃胸衍有獻五足牛者 此事不見太

史公書孝文王享國一年無五年也

先是文惠王始都咸陽 史記惠文王十三年始都咸

陽卽惠王也此作文惠誤

賀欲出光祿大夫夏侯勝當車諫 按此事又見勝傳

是時吳王濞封有四郡五十餘城 按高帝紀六年以

故東陽郡鄆郡吳郡五十三城立劉賈爲荆王吳濞

所封卽賈故地故傳云王三郡五十三城而伍被傳

云吳王王四郡之衆此志亦云四郡者楚漢之際會

稽嘗析爲吳郡灌嬰傳度江破吳郡長吳下得吳守

遂定吳豫章會稽郡此有會稽又有吳郡之證吳王
濞傳上患吳會稽輕悍亦兩郡兼舉也吳郡本會稽
所分言吳可以包會稽高帝紀單稱吳郡則爲二郡
此兼舉吳會故言四郡也

五行志下之下

谷永以爲歲首正月朔日是爲三朝 按漢初以十月

建亥爲歲首正月非歲首也

朔而月見東方謂之仄曆 周禮疏引尙書五行傳作

側匿

地理志上

又北播爲九河同爲逆河 逆當作迎迎逆聲相近義

亦不異宋子京改迎爲逆於義雖通終失班氏之舊

川曰虜池嘔夷注嘔夷出平舒 按師古之注本於鄭

氏周禮注蓋以祁夷當嘔夷也然孟堅實以澠水爲

嘔夷故於代郡靈邱縣云澠河東至文安入大河并

州川而於平舒之祁夷水不云并州川是班與鄭異

也顏注雖宗後鄭却失孟堅之旨

京兆尹 南陵霸水亦出藍田谷北入渭師古曰茲水

秦穆公更名以章霸功視子孫 按此皆班氏本文

謂霸水本名茲水秦穆公始更名耳非師古注也師

字後人妄加

沂音先歷反視讀曰示 此上當有師古曰三字

恆農郡 按京兆馮翊扶風不言屬司隸者尊京輔也
恆農河東承三輔之下故亦不言所屬河內河南則
中隔太原上黨兩郡故書屬司隸以別之

武帝元鼎四年置 元鼎以前屬何郡志失書

河東郡 莽曰兆陽 兆陽當作兆隊王莽傳河東河
內恆農河南潁川南陽爲六隊郡以志攷之南陽爲
前隊河內爲後隊潁川爲左隊恆農爲右隊河東爲
兆隊祈隊則治河南之滎陽莽傳云祈隊故滎陽也

上黨郡 襄桓 續志作襄垣宋子京云邵本作垣者
是也

河南郡 雒陽戶五萬二千八百三十九 按縣邑有
戶口數者京兆之長安馮翊之長陵扶風之茂陵河
南之雒陽潁川之陽翟僑陵南陽之宛蜀郡之成都
魯國之魯楚國之彭城凡十縣惟雒陽注於郡名之
下

中牟趙獻侯自耿徙此 臣瓚音義引春秋傳汲郡古
文證此中牟非趙地春秋正義史記集解皆載其說
師古以其與班氏異故不取予謂魏晉諸儒地理之

學極精小顏黨同妬真多所芟棄如此類者深可惜也

陳畱郡 武帝元狩元年置 按陳畱故梁地景帝分置濟川國都濟陽國除爲郡武帝始更名

南陽郡 鄧侯國注卽蕭何所封 按蕭何初封本是沛郡之鄆其後嗣乃封南陽之鄧師古於此殊未了

平氏禹貢桐柏大復山在東南淮水所在 按五嶽四瀆之祠皆載於志平氏有淮水祠獨失書恐傳寫有脫漏

南郡 秦置高帝元年更爲臨江郡五年復故 按高帝元年楚柱國共敖爲臨江王都江陵卽南郡故地也本項羽所封史家繫之高帝耳其五年敖子尉爲漢所虜則復爲南郡矣

江夏郡 鍾武侯國 王子侯表有鍾武侯度此卽度所封也志有兩鍾武縣一屬零陵郡一屬江夏郡度爲長沙頃王之子其初封必在零陵之鍾武而志以江夏之鍾武爲侯國蓋後來徙封如舂陵侯本在冷道後移於南陽也

九江郡 曲陽應劭曰在淮曲之陽 按東海郡曲陽

縣注亦引應劭曰在淮曲之陽二注當有一誤續漢志以此爲西曲陽

山陽郡 郟成侯國 表未見封郟成者宋子京云郟當作邛外戚侯表邛成屬濟陰濟陰與山陽相距不遠疑子京說是也

沛郡 敬邱侯國 按王子侯表魯共王子政封瑕邱侯疑卽此敬邱也山陽郡有瑕邱縣然不云侯國

魏郡 卽裴侯國 王子侯表作擗裴

邯溝侯國 王子侯表作邯溝

常山郡 高帝置 按項羽封張耳爲常山王都襄國

是常山之名不始於高帝蓋趙歇旣滅遂因爲郡耳高帝紀稱常山二十五城志止十八縣蓋後來稍分析之襄國本王都所在而志隸趙國亦一證也

中邱逢山長谷諸水所出東至張邑入濁 諸當依說文作渚濁當依說文作濁 濁或作蜀亦誤

南行唐牛飲山白陸谷滋水所出 說文作白陘谷

清河郡 清陽王都 按漢志稱王都者惟清河之清

陽信都之信都若泰山之盧則云濟北王都江夏之邾則云衡山王吳芮都以郡與國不同名也廣陵之廣陵則云江都易王非廣陵厲王胥皆都此此外無

言王都者淮南王安都壽春則朱贛言風俗及之

涿郡 南深澤 按中山有深澤縣故云南以別之李

吉甫元和郡縣志定州深澤縣本漢南深澤縣以涿

郡有深澤縣故此加南以別之然則中山之深澤有

南字涿郡之深澤無南字矣與今本互異以里望準

之中山實在涿郡之南然續漢志於安平國之南深

澤亦云故屬涿似今本元不誤

平原郡 平昌侯國 續漢志謂之西平昌以琅邪郡

亦有平昌縣也

千乘郡 溼沃 溼當作濕音宅合反

博昌博水東北至鉅定入馬車瀆幽州瀋 博水當作

時水職方氏幽州其浸菑時是也或作縣水亦誤

濟南郡 朝陽侯國 續志謂之東朝陽以南陽郡亦

有朝陽縣也

獠侯國蘇林音爻蔡謩音由 爻由聲相近

泰山郡 博有泰山廟岱山在西北求山上 求山上

三字蓋兗州山之譌

齊郡 鉅定 水經注作巨定定有澱音語之轉也後

人又加水旁

廣為山濁水所出 說文為作媯

琅邪郡 朱虛東泰山汶水所出東至安邱入維注前
言汶水出萊蕪入濟今此又言出朱虛入維將桑欽
所說有異或者有二汶水乎 按水經有二汶水一
出泰山萊蕪縣原山一出朱虛縣泰山源流各異師
古似未見水經故云然

靈門有高原山注屎卽柘字也 或云屎乃原之譌
拒根艾水東入海 以水經注攷之卽拒艾水也根乃
拒之譌拒字水經注俱从手旁

東海郡 海曲 曲當作西續志廣陵郡海西縣故屬
東海沈約宋志臨淮郡海西縣前漢屬東海後漢晉

屬廣陵是也三國志糜竺傳先主轉軍廣陵海西

蘭祺侯國 王子侯表作蘭旗

都陽侯國應劭曰春秋齊人遷陽是 按城陽國陽都

縣注亦引應劭曰齊人遷陽故陽國是二注似有一
誤然都陽侯音本城陽戴王之子或當日卽割陽都
之為侯國本非兩地乎

臨淮郡 諸郡國皆書屬某州惟臨淮武都隴西金城
天水武威張掖酒泉敦煌安定北地九真河閒廣陽
甯川膠東高密泗水六安失書按臨淮泗水當屬徐
州甯川膠東高密當屬青州河閒廣陽當屬冀州北

地當屬朔方六安當屬揚州九真當屬交州武都以
下九郡當屬涼州

武帝元狩六年置 晉志漢武帝分沛東陽置臨淮郡
東陽楚漢之際所置郡也漢初屬吳國

取慮注取音趨又音秋慮音廬 左傳釋文引如淳說
取音陬訾之陬慮音邾婁之婁

丹陽郡 故鄣郡屬江都 劉原父謂秦三十六郡無
鄣郡疑鄣非郡名武帝以故鄣地爲丹陽郡志但當
云故鄣屬江都以是譏班氏之誤此真瞽說也志云
故梁故淮南故齊故楚皆謂諸侯王國鄣非國名何

以得稱故鄣乎秦無鄣郡而楚漢之際則有之高帝
紀以故東陽郡鄣郡吳郡五十二縣立荆王是高帝
之世有鄣郡矣若縣名有故鄣此猶河南之故市涿
郡之故安當時或別有取義豈可援以爲鄣非郡之
證借如劉說但當云故屬江都何必又云故鄣而下
文更名丹陽之語更不可通矣

胡孰宋祁曰胡當作姑 按胡孰續志作湖孰今上元
縣東南五十里有湖孰鎮卽漢故縣所在自漢至晉
有湖孰縣無姑孰縣宋說非是

漸江水出南蠻夷中宋祁曰漸字當作浙字 水經

漸江浙江之水迴殊
說文分之甚晰予京
必不至此景祐刊誤
本必出偽託無疑也

攷異

漢書一

十五

本作漸江水子京亦失攷

零陵郡 武帝元鼎六年置 當云故屬長沙

廣漢郡 什方 表作汁防史記表作汁邠

葭明應劭曰音家盲 古音明如盲

蜀郡 汶江澙水出徼外南至南安東入江 按說文

澙水出蜀汶江徼外東南入江从水我聲別無澙字

水經注澙水出徼外逕汶江道南至南安入大渡水

大渡水又東入江亦从我 不从哉志作澙者傳寫之

譌然廣韻十六哈部有澙字注云水名出蜀則沿譌

實始於唐矣

越巂郡 闌 續志作闌當从之若本文是闌注不應

又音闌也

牂柯郡 同竝應劭曰竝音伴 竝伴聲相近

地理志下

金城郡 縣十三 按昭帝紀始元六年以邊塞闊遠

取天水隴西張掖各二縣置金城郡是金城始置止

有六縣此十三縣之中惟破羌允街兩縣宣帝所置

其餘俱不書置自何時可見志之闕漏者多也

天水郡 武帝元鼎三年置 蓋析隴西置李廣隴西

成紀人志屬天水是其證也

武威郡 故匈奴休屠王地武帝太初四年開 紀在元狩二年當從紀

張掖郡 故匈奴昆邪王地武帝太初元年開 按武帝紀元鼎六年分武威酒泉郡置張掖敦煌郡敦煌為酒泉所分則張掖必武威所分矣四郡之地雖皆武帝所開然先有武威酒泉而後有張掖敦煌以內外之詞言之武威酒泉當云元狩二年開張掖敦煌當云元鼎六年分某郡置不必云開也昆邪來降在元狩間而志以為太初張掖乃武威所分而志以張掖屬元年武威屬四年皆誤

酒泉郡 武帝太初元年開 紀在元狩二年

敦煌郡 武帝後元年分酒泉置 紀在元鼎六年

效穀師古曰本魚澤障也桑欽說孝武元封六年濟南崔不意為魚澤尉教力田以勤效得穀因立為縣名此班氏本文非小顏注也桑欽書唐初已失傳師古曰三字衍

安定郡 武帝元鼎三年置 蓋析北地置

上郡 施有五龍山帝原水黃帝祠四所 按郊祀志宣帝立五龍山僊人祠及黃帝天神帝原水凡四祠於膚施五龍山一也帝即天神帝二也原水三也

黃帝四也

朔方郡 屬并州 按武帝元封五年置十三部刺史并與朔方各自爲部未嘗屬并州也朔方之屬并乃光武建武十一年事耳上郡亦屬朔方部故馮野王爲上郡太守朔方刺史蕭育奏封事薦之

雲中郡 北與注闕駟曰廣陵有輿故此加北 按輿縣屬臨淮後漢始屬廣陵

代郡 班氏秦地圖書班氏 此注疑有脫譌秦地圖蓋卽蕭何所收者琅邪郡長廣縣奚養澤在西秦地圖曰劇清地史引秦地圖祇此二條

狝氏孟康曰狝音權氏音精 示有祁音氏有支音祁與權支與精聲皆相近

漁陽郡 白檀洫水出北蠻夷注洫音呼鴟反 按水經注濡水流逕漁陽白檀縣故城地理志曰濡水出縣北蠻中蓋酈元所見之漢書本作濡水不知何時譌濡爲洫師古不能正也漢之白檀縣在今古北口外灤水所經濡灤古今字別無洫水之名

趙國 襄國西山渠水所出東北至任入寢又有蓼水馮水皆東至朝平入渦 按說文渦水出趙國襄國之西山東北入寢此渠水當是渦水之譌說文又云

灑水出趙國襄國東入馮此馮水恐亦灑水之譌也
廣平國武帝征和二年置爲平干國宣帝五鳳二年
復故按王溫舒爲廣平都尉在元朔元狩之間是
平干國未置之前已爲廣平郡矣五鳳二年平干繆
王坐殺謁者會薨不得代國除仍爲廣平郡故云復
故也當云故廣平郡某年置乃與復故之文相應哀
帝建平三年更置廣平國志又失書皆脫漏之甚者
河閒國故趙按河閒與真定信都廣平皆故趙地
常山中山雖爲郡仍屬趙也志或書或不書
留川國劇按北海郡亦有劇縣志稱留川後并北

海則二劇疑卽一地然北海之劇本是侯國卽留川
懿王子錯所封蓋析劇縣之鄉爲侯國別屬北海而
劇縣之隸留川如故非重出也

東平國故梁國當云故梁無國字

廣陵國高帝六年屬荊州州字衍高帝六年封劉
賈爲荊王兼有廣陵之地故云屬荆其時未設諸州
刺史不得言荊州也

本秦京師爲內史分天下作三十六郡今以志攷之
則三十六郡者三川河東南陽南郡九江會稽潁川
碭泗水薛東郡琅邪齊上谷漁陽右北平遼東遼西

代鉅鹿邯鄲上黨太原雲中九原鴈門上郡隴西北
地漢中巴蜀長沙南海桂林象郡也裴駟注史記以
鄣黔中與內史足三十六郡之數而不數南海三郡
與漢志不合

高祖增二十六 謂河內汝南江夏豫章常山中山清
河魏郡涿郡勃海平原千乘泰山東萊東海廣漢定
襄桂陽武陵鄣郡城陽濟南楚國燕國淮陽國并內
史也晉志以鄣郡爲秦置此志但云故鄣郡不云秦
郡蓋楚漢之際所置也孝惠時齊王獻城陽郡爲魯
元公主湯沐邑高后割齊之濟南郡爲呂王奉邑知

此二郡當置於高帝矣

文景各六 文帝六謂河間菑川膠東膠西廬江衡山

景帝六謂北海濟東即東平山陽濟陰江都廣川也文

帝建國九濟南城陽因舊郡濟北即泰山郡景帝建
國九中山常山清河因舊郡濟川國後廢故皆不數

武帝二十八 謂馮翊扶風恆農陳留臨淮零陵天水
安定西河朔方武都武威張掖酒泉敦煌犍爲牂柯
越巂益州元菟樂浪蒼梧交阯合浦九真廣平真定
泗水也南海鬱林日南即秦南海三郡沈黎文山珠
厓儋耳臨屯真番蒼海後皆廢故不數

昭帝一 金城也

侯國二百四十一 今數之止百九十有四蓋史有闕

文

自井十度至柳三度謂之鶉首之次 十二次宿度惟
載鶉首鶉火壽星析木餘皆闕如蓋班氏未定之本
其述分壘既以東平須昌壽張爲宋分又云東平須
昌壽張皆在濟東屬魯非宋地也當攷亦疑而未決
之詞也所述星度與蔡邕月令章句合較之律歷志
每次大率差五六度

汝南之召陵滙疆新汲西華長平河南之開封中牟陽

武酸棗卷

以志攷之新汲屬潁川非汝南酸棗屬

陳畱非河南蓋漢時郡國屬縣更易靡常史家不能
攷而悉書之

自東井六度至亢六度謂之壽星之次 東井當作軫

南至浮水繁陽內黃斥邱 志未見浮水縣繁陽以下

屬魏郡

南得涿郡之易容城范陽北新城 按中山國有北新

成縣不屬涿郡成城字亦異

自危四度至斗六度謂之析木之次 危當作尾

子之營兮遭我虜嶼之間兮 古書營與環通說文營

市居也讀如闌闌之闌還與環音亦同也猶農聲相近故文或爲囷

東平須昌壽張 壽張本名壽良光武避趙王良諱改良爲張此班氏追改

溝洫志

山行則楬 史記山行卽橋橋與楬則與卽皆聲相近也

武安侯田蚡爲丞相其奉邑食郿 郿與俞同清河郡之縣也俞侯欒布子賁以景帝中六年嗣侯元狩六年坐爲太常犧牲不如令國除當武安爲相時賁尙

無恙而奉邑得食郿者布封邑僅千八百戶除所封之外仍屬之有司也

藝文志

記百三十一篇七十子後學者所記也 按鄭康成六

藝論云戴德傳記八十五篇戴聖傳記四十九篇此云百三十一篇者合大小戴所傳而言小戴記四十九篇曲禮檀弓雜記皆以簡策重多分爲上下實止四十六篇合大戴之八十五篇正協百卅一之數隋志謂月令明堂位樂記三篇爲馬融所足蓋以明堂陰陽三十三篇樂記二十三篇別見藝文志故疑爲

東漢人附益不知劉向別錄已有四十九篇矣月令三篇小戴入之禮記而明堂陰陽與樂記仍各自爲書亦猶三年問出於荀子中庸緇衣出於子思子其本書無妨單行也記本七十子之徒所作後人通儒各有損益河閒獻王得之大小戴各傳其學鄭氏六藝論言之當矣謂大戴刪古禮二百四篇爲八十五篇小戴又刪爲四十九篇其說始於晉司空長史陳邵而陸德明引之隋志又附益之然漢書無其事不足信也或謂漢書不及禮記攷河閒獻王所得書禮記居其一而郊祀志引禮記燔柴於太壇祭天也瘞

蕤於太折祭地也又引禮記天子祭天地及山川歲

徧又引禮記天子籍田千畷以事天墜又引禮記祀

典卽祭法也律歷志謂之祭典功施於民則祀之天文日月星辰

所昭仰也地理山川海澤所生殖也又引禮記唯祭

宗廟社稷爲越紼而行事梅福傳引禮記孔子曰某

殷人也韋元成傳亦引禮記王制禮記祀典之文皆

在四十九篇之內志不別出記四十九篇者統於百

三十一篇也

春秋古經十篇謂左氏經也劉歆傳歆校秘書見

古文春秋左氏傳又云左氏傳多古字古言許慎五

經異義言今春秋公羊說古春秋左氏說

合於堯之克攘注攘古讓字按說文揖攘字从手責

讓字从言數奪字从支

易之嗛嗛一謙而四益注嗛字與謙同古書言芻字

與口芻字往往相通故謙或為嗛

五子竹八篇五古伍字呂氏春秋五員亡荆古今人

表伍參亦作五參非文之譌陳涉傳銓人五逢史記

作伍徐

凡數術百九十家十字衍

漢書三

廿二史攷異

錢大昕學

陳勝傳

陳勝字涉陽城人師古曰地理志屬汝南郡按汝南

潁川皆有陽城縣汝南之陽城為侯國宣帝時始置

此當是潁川之陽城也

項籍傳

梁使羽與沛公別攻城陽城陽當作成陽

諸別將皆屬號卿子冠軍皆屬下當有義字

瑕邱公申陽者孟康曰瑕邱縣之老人也姓申名陽

予謂此公非老人之稱春秋之世楚縣令皆僭稱公楚漢之際官名多沿楚制故漢王起沛稱沛公楚有蕭公薛公鄒公留公柘公漢有滕公戚公皆縣令之稱此瑕邱公亦是瑕邱縣令孟說非也

張耳傳

東井者秦分也先至必亡 亡字疑誤

案汲本詳林本皆作王

貫高等乃壁人柏人要之置厠文穎曰置人厠壁中以伺高祖 予謂置者郵傳之名厠與側同非厠溷之厠也伏人於置側欲要而殺之

韓王信傳

成帝時繼功臣後封增兄子岑爲龍額侯薨子持弓嗣

按功臣表元封

當作元延

元年節侯共以寶從父昆弟

紹封子敞嗣蓋增之兄子於寶爲從父昆弟也惟兩侯之名表傳各異未詳孰是

荆燕吳傳

荆王劉賈 宗室王例不書姓劉賈劉澤獨書姓衍文

故孽子悼惠王王齊七十二城庶弟元王王楚四十城

按高帝紀封齊王七十三縣此云七十二或彼文

誤也楚元王傳及高紀俱云王三十六縣此云四十

城恐誤

御史大夫鼂錯營或天子師古曰營謂回繞之也 營
與熒通非回繞之義

劉向傳

父德武帝時治淮南獄 按淮南王安以謀反誅事在
元狩元年此傳言昭帝卽位德待詔丞相府年三十
餘自元狩元年數至後元二年昭帝卽位實三十六
年矣當淮南獄起之時恐德尙未生安得預治獄之
列

孝武帝時兒寬有重罪繫按道侯韓說諫曰前吾邱壽
王死陛下至今恨之今殺寬後將復大恨矣上感其
言遂貰寬復用之 此事寬傳不載韓說名在佞幸
傳而能爲寬強諫亦自可取當表而出之

下太傅韋元成 元成爲太子太傅不當刪太子字蓋
轉寫失之

故其詩曰密勿從事 密勿卽黽勉聲之轉也古讀勿
如沒尔雅蠹沒勉也亦密勿之異文

日月鞠凶 鞠告聲相近

雨雪庶庶見覘聿消 聿曰聲相近

易曰飛龍在天大人聚也 聚造聲相近

及秦惠文武昭嚴襄五王 惠文一也武二也昭三也

嚴襄卽莊襄四也此云五王者蓋昭王之後尙有孝文王傳脫孝文二字耳

劉歆傳

博見強志 志古識字後文賢者志其大者不賢者志其小者藝文志多見而志之皆從古文

田叔傳

趙陘城人也 史記陘城今在中山國攷地理志中山有苦陘有陸成無陘城縣也

曹參傳

遂取臨淄還定濟北郡師古曰時未有濟北郡史追書

之耳

按項羽封田安爲濟北王都博陽田榮攻殺

安并三齊之地因以濟北爲郡非追書也

擊龍且軍於上假密文穎曰或以爲高密 高假聲相

近

參之相齊齊七十城 按吳王濞傳悼惠王王齊七十

二城高五王傳亦云食七十餘城此云七十者舉成

數也

哀帝時乃封參元孫之孫本始爲平陽侯 按功臣表

本始乃參元孫之元孫傳脫元字

張良傳

景駒自立為楚假王在陳畱 陳字衍

案汲本無陳字

封雍齒為什方侯 功臣表作汁防

陳平傳 陽武戶牖鄉人也師古曰陽武縣名屬陳畱

按地理

志陽武屬河南不屬陳畱

受封平為曲逆侯盡食之 漢時封縣侯戶數多少不

同如蕭何始封鄼食八千戶後又益封二千戶元狩

中以鄼戶二千四百封其曾孫慶宣帝時以鄼戶二

千封其元孫建世封號雖同而租入迥別蓋一縣之

戶不止此數除侯所食外其餘歸之有司也高祖功

臣盡食一縣者惟平一人

周勃傳

於是陰謀以為少帝及濟川淮陽恒山王皆非惠帝子

此稱恒山後稱常山史駁文也攷外戚恩澤侯表

高后時以孝惠子侯者四人襄城侯義三年為常山

王更名即少帝也軹侯朝四年為常山王壺關侯武

六年為淮陽王昌平侯大七年為呂王異姓諸侯王

表高后七年呂王產徙梁十一月丁巳王大始故平

昌侯恩澤侯表傳稱濟川王表稱呂王其實一人也

作昌平侯初高后割齊之濟南郡為呂王奉邑及呂產徙封改

呂國曰濟川以王孝惠之子此事之所宜有者則濟川卽濟南矣孝景時分梁爲濟川國攷梁孝王始封其時濟南王辟光尙存七國旣平梁又未嘗益封此兩濟川者名同而實異也

文帝擇勃子賢者皆推亞夫廼封爲條侯師古曰縣在勃海地理志作菑字其音同耳 按地理志勃海郡有脩市縣侯國應邵讀脩爲條此清河綱王子寅所封也又信都國有脩縣師古亦讀爲條亞夫所封蓋信都之脩非勃海之脩市也志作脩不作菑小顏注誤

夏侯嬰傳

夏侯嬰沛人也 嬰本夏侯氏而標目稱滕不稱夏侯石奮傳標題不云石而云萬石皆因史公元文然於例終未畫一

曾孫頗尙平陽公主坐與父御婢姦自殺國除頗尙主主隨外家姓號孫公主故滕公子孫嬰爲孫氏 按漢景帝女平陽公主本陽信公主王皇后生元帝女平陽公主衛婕妤生其外家皆非孫氏此夏侯頗所尙之平陽公主蓋別是一人不知何帝女也馬端臨帝系攷載高祖一女魯元公主文帝二女館陶長公

主及周勃子勝之所尚公主景帝三女平陽公主南宮公主隆慮公主武帝五女鄂邑蓋長公主夷安公主衛長公主諸邑公主陽石公主宣帝二女館陶公主敬武公主元帝三女平都公主平陽公主潁邑公主皆據班史紀傳然尚有未備如博成侯張建建始四年坐尚陽邑公主與婢姦主笏數醉罵主免夏侯頗尚平陽公主成帝微行過陽阿主作樂此三事皆遺漏而南宮公主婿彤申見功臣侯表馬氏亦失書

灌嬰傳

灌嬰睢陽販繒者也 依班史例當云睢陽人也以販

繒爲生

傅寬傳

傅寬以魏五大夫騎將從 傅寬斬歙二人史失其所

居郡縣

酈食其傳

陳畱高陽人也 按地理志陳畱郡無高陽縣蓋鄉名非縣名涿郡琅邪郡皆有高陽縣然非食其所居之高陽也高祖紀沛公西過高陽文穎云聚邑名屬陳

畱園

按園縣漢屬淮陽後漢始屬陳畱

臣瓚云陳畱傳在雍邱西南

婁敬傳

婁者劉也賜姓劉氏 婁劉聲相近今吳人呼婁江曰
劉家河吾邑婁塘市土人亦呼劉

濟北王勃傳

國除爲北安縣屬泰山郡 按地理志泰山郡無北安
縣惟盧縣注云濟北王都疑北安爲盧之誤或初名
北安而後改盧也

息夫躬傳

烏孫兩昆彌弱卑爰寔強盛 卑爰寔匈奴傳作卑援

寔

循烏孫就屠之跡 孫字衍

衛綰傳

代大陵人也 按地理志大陵縣屬太原不屬代郡漢
初以山南太原之地屬代國故繫大陵於代

直不疑傳

稍遷至中大夫 按公卿表景帝中六年中大夫令直
不疑夏爲衛尉此傳脫令字中大夫令本衛尉也景
帝初改後復

周仁傳

以是得幸入臥內 周仁列於佞幸乃與萬石君直不
疑同傳似非其倫

張敞傳

景帝時尊重常為九卿至武帝元朔中代韓安國為御史大夫
按公卿表敞代安國為御史大夫在元光四年非元朔也任御史大夫五年以老病請退則在元朔中耳表於景帝五年書安邱侯張敞為奉常據傳敞為安邱侯說少子未嘗嗣侯此表之誤也又表於景帝元年有廷尉敞不書姓疑亦張敞也

文三王傳

地北界泰山西至高陽蘇林曰陳畱北一作縣高陽非縣名文穎以為聚邑名者得之

與睢陽太守客俱出同車按睢陽非郡名不得有太守當作淮陽因上有睢陽字相涉而誤耳史記本作淮陽淮陽國景帝四年除為郡故得置太守梁與淮陽接壤故太守客得至梁境為睢陽人所殺也

賈誼傳

夫樹國固必相疑之執沈彤曰夫當作大鄭氏云今建立國秦大其執必固相疑也若作夫樹國云云則當請廢封建矣或於固字句絕則當請無立國於險矣而下文皆不之及但言國不可太大宜眾建諸侯而少其力故知夫為大之譌

諸侯之地其削頗入漢者為徙其侯國及封其子孫也
所以數償之 沈彤曰也當作他謂諸侯或以罪黜
其地被削多入於漢者若因其所存地為國則國小
而其子孫亦不得封故為之徙其侯國并封其子孫
於他所如其被削之數償之也師古注誤

病非徒癩也又苦蹠蹠師古曰蹠古蹠字音之石反足
下曰蹠今所呼腳掌是也 按說文無蹠字小顏讀
為蹠恐亦臆說當是蹠字之譌說文蹠脛肉一曰曲
脛讀若達渠追切蹠亦當從說文作蹠蹠彌戾也蹠蹠
謂足脛反戾不偃行動

鼂錯傳

丞相青翟中尉嘉廷尉敞劾奏錯 是時開封侯陶青
為丞相翟字衍文也因武帝時有丞相嚴青翟相涉
而誤景帝紀元年遣御史大夫青翟誤與此同

枚乘傳

凡可讀者不二十篇 不當作百藝文志枚舉賦百二

十篇

案源本評林本皆作百

路溫舒傳

鉅鹿東里人也 地理志鉅鹿郡無東里縣

韓安國傳

梁城安人也 按地理志成安縣屬陳畱郡陳畱本梁地武帝始置爲郡故史繫之梁耳城當作成

若是則北發月氏可得而臣也師古曰發猶徵召也

北發北狄地名師古注誤詳見武帝紀

趙敬肅王彭祖傳

大鴻臚禹 王禹也

中山靖王勝傳

令諸侯以私恩自裂地分其子弟而漢爲定制封號輒

別屬漢郡 按地理志諸侯王國二十如趙真定河

間廣陽城陽廣陵皆止四縣菑川泗水止三縣高密

六安皆五縣魯六縣東平楚皆七縣竊疑漢初大封同姓幾據天下之半文景以後稍有裁制狀諸侯王始封往往兼二三郡之地其以罪削地者史亦不多見何至封域若此之小及讀中山王勝傳謂武帝用主父偃謀令諸侯以私恩自裂地封其子弟而漢爲定制封號輒別屬漢郡漢有厚恩而諸侯地稍自分析弱小云始悟諸侯王國所以日削者由王子侯國之多以王子侯表徵之城陽五十四人趙三十五人河間二十三人菑川二十一人魯二十人王國之食邑皆入於漢郡無怪乎封圻之日蹙矣郡領縣多者

無過於琅邪東海琅邪縣五十一東海縣三十八琅
邪與城陽菑川膠東高密四國鄰東海與魯泗水楚
城陽諸國鄰侯國之析置者多屬焉此所領之所以
多於它郡也中山之陸成表作陸城新處表作薪處安險皆嘗
爲侯國改屬它郡矣陸成新處皆屬涿郡惟安險表失書所屬亦當屬涿郡也宣
元之世中山絕而復封所封又是帝子故稍以舊封
益之如北新成劉向以爲涿郡地理志末論十二國分域蓋出於劉向
而志屬中山亦是後來益封之證也

哀帝復立雲客弟廣漢爲廣平王薨無後平帝元始二
年復立廣川惠王曾孫倫爲廣德王奉靖王後 羅

願曰按諸侯王表廣漢至王莽時猶在安得遽云薨
無後此廣德王倫自以廣川系絕故封攷之廣川惠
王傳可見非續中山也中山子孫侯者二十餘人不
應取於見絕之廣川明矣大昕按劉敞以此倫封廣
德王廣川王後又封廣德王俱是平帝二年事必有一
誤今據羅氏辨正則此傳薨無後以下二十三字
明是衍文倫療字形相近非有二人也

李廣傳

隴西成紀人也 按地理志成紀縣屬天水不屬隴西
天水郡武帝所置漢初蓋屬隴西也

典屬國公孫昆邪 卽平曲侯公孫渾邪丞相賀之大父也

將軍其率師東轅彌節白檀孟康曰白檀縣名屬右北平 按地理志白檀屬漁陽不屬右北平孟注因下有右北平字而誤耳

衛青霍去病傳

路博德西河平州人 地理志西河郡有平周無平州董仲舒傳

先是遼東高廟長陵高園殿災仲舒居家推說其意少稟未上主父偃侯仲舒私見嫉之 按主父偃傳元

光元年西入關而高廟高園殿災乃在建元六年其明年始改元元光計其年月似不相應

公孫宏傳

其以高成之平津鄉戶六百五十封丞相宏爲平津侯恩澤侯表云三百七十三戶高成屬勃海郡表作高城

好問近乎知 此禮記中庸文今本作好學

兒寬傳

居位九歲以官卒 表稱爲御史大夫八年卒

張湯傳

劾鼠掠治傳爰書 傳當作傳傳音附謂附於爰書也

師古訓為傳逮似非

王朝齊人以術至右內史 公卿表作王鼃鼃與朝同

司馬遷傳爰益朝錯列傳第四十一即鼃錯也

張安世傳

子勃嗣 表作做古書勃為教教與做字形相涉因譌

為做耳

杜業傳

業有材能 業字君都見公卿表

鉅鹿太守孫宏 翟方進傳作孫闕

司馬遷傳

昔在顓頊 劉知幾謂篇首當云司馬遷字子長馮翊

夏陽人繼以其自序曰云云方合著述之體其說固

朕朕此例人所共知孟堅命世大才詎猶未了蓋叔

皮父子踵史遷而作書故自敘一篇悉因舊文附以

後事取述而不作之義意主撝謙非失於檢照也

燕刺王旦傳

其者寡人之不及與 其者之者讀如諸

廣陵王胥傳

宣帝即位封胥四子聖曾寶昌皆為列侯 下文云胥

子南利侯寶坐殺人奪爵卽四侯之一也子弟晦之
曰攷王子侯表但有朝陽荒侯聖平曲節侯曾南利
侯昌三人別無名寶者表稱南利侯昌地節二年坐
賊殺人免此傳云南利侯寶疑誤

武五子傳贊

建元六年蚩尤之旗其長竟天後遂命將出征略取河
南建置朔方其春戾太子生 按本傳戾太子元狩
元年立爲皇太子年七歲矣初上年二十九乃得太
子甚喜以年歲推之戾太子生於元朔元年非建元
六年也衛青傳元朔元年春衛夫人有男外戚傳孝

武衛皇后元朔元年生男據遂立爲皇后立七年而
男立爲太子皆與本傳合孟堅贊語似未推校年歲
若衛青收河南置朔方郡則在元朔二年又在戾太
子生之後矣

嚴助傳

而中國之人不能其水土也師古曰能堪也 能耐二
字古書多通用食貨志能風與旱鼃錯傳其性能寒
其性能暑趙充國傳漢馬不能冬西域傳不能饑渴
師古皆讀如耐此亦當從耐音

朱買臣傳

會邑子嚴助貴幸 邑子猶言邑人助與買臣皆吳人

同邑故有邑子之稱疏廣傳公卿大夫故人邑子設

祖道供張東都門外趙廣漢傳廣漢疑其邑子榮畜

教令師古曰蘇賢同邑之子也尹翁歸傳定國家在東海欲屬託

邑子二人師古曰邑子同邑人之子也皆與此同義六朝碑多有

題邑子者

吾邱壽王傳

吾邱壽王 兩都賦序作虞邱虞吾聲相近

東方朔傳

平原厭次人也師古曰高祖功臣表有厭次侯爰類是

則厭次之名其來久矣而說者乃云後漢始為縣於

此致疑斯未通也 按地理志平原郡有富平侯國

應劭云明帝更名厭次後人因疑西京無厭次之名

攷厭次侯爰類傳子至孝文五年以謀反誅國除而

張安世封富平侯在昭帝時其封邑本在陳留郡及

子延壽嗣侯上書讓減戶邑徙封平原乃在宣帝之

世朕則昭帝以前平原無富平侯國也蓋厭次國除

之後本為厭次縣宣帝移富平侯國於此始去厭次

之名明帝時仍復其舊水經注謂厭次故名非始明

帝蓋復故耳其說精而當矣漢時列侯國除有即為

縣者如武帝以穰之盧陽鄉宛之臨駝聚封霍去病
爲冠軍侯去病子嬪薨國除爲冠軍縣是也武帝以
高成之平津鄉封公孫丞相爲平津侯元帝以僮之
樂安鄉封匡衡爲樂安侯而地理志無平津樂安縣
是國除之後仍爲鄉矣南陽郡有博山侯國故順陽
縣哀帝以封丞相孔光改名明帝改曰順陽亦是從
其舊名與厭次正相類

是婁數也師古曰婁數戴器也以盆盛物戴於頭者則
以婁數薦之 釋名婁數猶局縮皆小意也說文檣
盪負戴器婁數卽檣盪聲之轉也與寄生聲亦相近

故樹上之寄生亦有婁數之名廣韻婁數四足几也
此與蘇林四股鉤之說相近皆以形相似名之

公孫賀傳

語在江充戾園傳 按外戚王夫人傳云語在戾太子
傳劉屈氂傳云語在太子傳 上文有戾字故但稱太子 而此與江
充傳俱稱戾園亦例之不一也

朱雲傳

成帝時丞相故安昌侯張禹以帝師位特進甚尊重

按禹以成帝河平四年爲丞相鴻嘉元年以老病乞
骸骨賜安車駟馬罷就第以列侯朝朔望位特進此

稱位特進則在罷相之後故朱雲但斥言安昌侯張禹不言丞相而成帝亦但以廷辱師傅罪雲也文當云故丞相安昌侯今本以故字屬丞相下乃轉寫之誤耳

梅福傳

書曰毋若火始庸庸 今本作燄燄庸燄聲相近

遂下詔封孔子世為殷紹嘉公 孔何齊初封殷紹嘉

侯尋進爵為公

霍光傳

自先帝時桀已為九卿 公卿表後元二年太僕上官

桀為左將軍其初除太僕表不得其年蓋征和二年公孫敬聲有罪下獄即以桀代之也

御史大夫蔡誼 即蔡義也儒林傳亦作蔡誼按鄭仲

師注周禮云古者書儀但為義即威儀字今時所謂義為

誼即仁義字漢書項籍傳贊仁誼不施董仲舒傳布德施

仁以厚之設誼立禮以導之知自貴於物狀後知仁

誼知仁誼狀後重禮節將欲興仁誼之休德明帝王

之法制正其誼不謀其利五尺童子羞稱五伯為其

先詐力而後仁誼也夏侯勝傳孝武皇帝躬仁誼皆

以誼為義義者宜也故字从宜儒林傳東郡太守翟誼即翟義

金日磾傳

宣帝即位賞為太僕霍氏有事萌牙上書去妻 按公

卿表宣帝甘露四年秭侯金賞為侍中太僕距霍氏
之亡已十六年矣霍氏有事之始賞祇為侍中未任
太僕也

日磾傳子節侯賞 功臣表失載賞諡

趙充國傳

至征和五年 按征和無五年疑有誤

數使使尉黎危須諸國 西域傳作尉犁

充國乞骸骨賜安車駟馬黃金六十斤罷就第 按公

卿表于神爵二年書後將軍充國不言何年罷免據

此傳似即是神爵二年事而常惠傳言甘露中後將

軍充國薨天子遂以惠為右將軍則充國雖以病免

宣帝猶以將軍待之終充國之身虛將軍位不置也

元始中修功臣後復封充國會孫伋為營平侯 恩澤

侯表失載此事

常惠傳

是時烏孫公主上書言匈奴發騎田車師 此傳與西

域傳相同者幾三百言

諡曰壯武侯 功臣表作壯侯

陳湯傳

君子以功覆過而爲之諱行事 按小顏解行事爲滅項之事是也劉貢父疑其不辭欲以行事屬下句淺陋可笑

西域都護段會宗爲烏孫兵所圍驛騎上書願發城郭敦煌兵以自救丞相王商大將軍王鳳及百僚議數日不決 按會宗傳竟寧陽朔中再爲西域都護不云爲烏孫所圍惟元延中嘗被圍其時又非都護且不與丞相王商大將軍王鳳同時此傳云會宗爲烏孫所圍似當在陽朔中又攷公卿表王商于河平四

年罷相以張禹代之其明年始改元陽朔使會宗果于陽朔中被圍則丞相乃張禹非王商矣以二傳參互攷之當有一誤或會宗傳陽朔字當爲河平或此傳王商當爲張禹也

段會宗傳

天水上邽人也 按地理志上邽縣屬隴西趙充國傳外戚上官皇后傳亦云隴西上邽人此作天水疑誤末振將殺大昆彌會病死漢恨誅不加 按西域傳大昆彌翎侯難栖殺末振將漢恨不自責誅末振將復使段會宗斬其太子番邱會宗以難栖殺末振將雖

不指爲漢合於討賊奏以爲堅守都尉是末振將實
難栖所殺傳以爲病死者誤也

小昆彌烏犁靡者末振將兄子也 西域傳作安犁靡
烏安聲相近

兩龔傳

執金吾閻崇 公卿表作閻宗

鮑宣傳

宣不知情宋祁曰情字上疑有其字 按後漢書孔融
傳漢律與罪人交關三日已上皆應知情知情者應
坐罪不知情者不坐故揚雄傳云雄不知情有詔勿

問宋子京疑情上當有其字蓋未攷漢律也

韋賢傳

黼衣朱紱注朱紱爲朱裳畫爲亞文也亞古弗字 亞
當作西兩己相背也與亞次字音義全別此朱紱諸
侯之服當訓爲鞞不當作黼黻解師古注誤

丙吉傳

豈宜褒顯 豈宜者猶言宜也古人語急以豈不爲不
不可爲可此當言豈不宜亦語急而省文耳朱子文
疑當爲直字非孟堅之旨

眭孟傳

孝昭元鳳三年正月 眭孟言災異涉妖妄蓋夏賀良
之流其事已見五行志不必別爲立傳

夏侯勝傳

初魯共王分魯西寧鄉以封子節侯別屬大河大河後
更名東平故勝爲東平人 按魯共王子寧陽侯恬
瑕邱侯政皆諡節侯此傳所稱節侯蓋寧陽侯也地
理志寧陽屬泰山郡不屬東平蓋宣帝建東平爲王
國復以寧陽屬它郡

從始昌受尙書及洪範五行傳說災異 始昌習尙書
名已見儒林傳其說災異祇有言柏梁臺災事附見

勝傳可矣乃以兩夏侯題其篇目何也

京房傳

房以建昭二年二月朔拜上封事 二月當作三月以
三統術推是年正月甲午朔二月甲子朔房封事所
稱辛酉者正月二十八日也己卯庚辰辛巳則二月
之十六十七十八日也張晏注以辛巳蒙氣乘卦爲
晉卦解卦太陽侵色爲大壯攷卦氣圖晉解大壯皆
二月卦則房上封事必在二月後矣

迺辛巳蒙氣復乘卦太陽侵色張晏曰晉卦解卦也太
陽侵色謂大壯也 以三統術推是年二月二十四

日丁亥春分其前六日辛巳正當晉卦用事之始而
蒙氣乘之春分後解卦用事又六日七分而大壯乃
用事則三月癸巳朔也大壯消息卦晉解皆雜卦
迺丙戌小雨丁亥蒙氣去 丙戌四月二十四日其明
日丁亥直小滿小畜卦用事亦雜卦也
己丑夜有還風盡辛卯 己丑四月二十七日辛卯二
十九日
至癸巳日月相薄 癸巳五月二日正當乾卦用事之
始而有相薄之異故云邪陰同力而太陽爲之疑也
翼奉傳

注翼氏風角曰木落歸本水流歸末故木利在亥水利
在辰 利當作刑木刑於亥水刑於辰火刑於午金
刑於酉五行家所謂自刑也亥爲木之生方故云本
辰爲水之死方故云末

七月己酉地復震 以三統術推初元二年七月己未
朔無己酉日恐是乙酉之誤

蓋聞聖賢在位 云云 按元帝紀初元二年三月詔書
舉茂材異等直言極諫之士文與此略同其七月又
有詔書却無舉直言極諫事此傳誤合兩詔爲一因
添一年地再動之語

今年太陰建於甲戌 古法太陰與太歲不同奉上封
事在初元二年以今法推之太歲正在甲戌蓋以太
歲爲太陰實自奉始矣漢初言太歲者皆用超辰之
法故太初之元歲在丙子依此下推初元二年歲當
在癸酉而云甲戌者以三統歲術計之太初元年歲
星在婺女六度已是星紀之末則太歲亦在丙子之
末太歲與歲星每年多行一分至太始二年歲星已
度壽星而入大火太歲亦超乙酉而在丙戌矣故算
至初元二年太歲得在甲戌也
注孟康曰太陰在甲戌則太歲在子 按太陰在戌太

歲當在申孟說非也

律以庚寅初用事歷以甲午從春孟康曰十一月庚寅

日黃鍾律初起用事也 按推律自歲前十一月始

依三統術推得初元二年天正癸亥朔即初元元年十一月也

冬至與朔同日庚寅則月之二十八日也冬至日黃

鍾律始用事孟云庚寅日黃鍾律初起用事其法未

詳也又以三統術推是年二月四日甲午春分故云

歷以甲午從春

尹翁歸傳

少子岑歷位九卿至後將軍 岑字子河嘗爲執金吾

元延元年爲後將軍公卿表作右將軍誤
韓延壽傳

延壽代蕭望之爲左馮翊而望之遷御史大夫 按公卿表望之之後尙有左馮翊彊一人非卽以延壽代也望之由馮翊遷大鴻臚又二年而拜御史大夫其時延壽亦爲左馮翊矣傳所書未核

鄭崇傳

上遂下詔曰朕幼而孤皇太太后躬自養育惠澤茂焉前追號皇太太后父爲崇祖侯惟念德報未殊朕甚惡焉侍中光祿大夫商皇太太后父同產子其封商

爲汝昌侯 按哀帝紀建平四年二月封帝太太后從弟侍中傅商爲汝昌侯六月尊帝太太后爲皇太太后此詔稱皇太太后史家追改

蕭望之傳

下少府宋畸問狀注畸音居宜反 公卿表作宋疇字之譌也宣帝紀有詹事畸師古曰宋畸也亦音居宜反蓋由詹事歷大鴻臚左馮翊遷少府

蕭育傳

歷冀州青州兩部刺史

育又爲朔方刺史

見馮野王傳

本

傳失書

馮奉世傳

其先馮亭爲韓上黨守 此傳述馮氏先世百有餘言
與司馬遷揚雄自序略相類疑馮商續太史公書亦
有自序孟堅仍其元文耳

送大宛諸國客至伊脩城 西域傳吏士四十人田伊
循循脩二字相似因譌作脩耳三國志蜀後主傳費
禕爲蜀降人郭循所殺禕傳亦作郭循而魏三嗣主
傳張嶷傳竝作郭脩

東平王宇傳

詩不云乎毋念爾祖述脩厥德 述與聿同爾雅適自

也孫炎云適古述字讀聿

定陶王康傳

追尊其王爲共皇帝 帝字衍文哀帝紀外戚傳但云
共皇無稱帝之文丁姬初稱共皇后後稱帝太后太
后之號從子不從夫也漢制非有天下者不稱帝故
高帝父太公稱太上皇而後漢追稱孝德皇孝崇皇
孝仁皇皆不稱帝

匡衡傳

於是司隸校尉王尊劾奏衡 此奏已見尊傳較此
文爲詳

封樂安侯食邑六百戶 恩澤侯表作六百四十七戶

此舉其成數耳

初元元年郡圖誤以閩佰為平陵佰 漢時郡國各有圖至魏猶狀清河平原爭界八年更二刺史不決孫禮請以烈祖初封平原時圖決之是也

衡遣從史之僮收取所還田租穀千餘石入衡家 按衡以建昭三年封侯距初元之元已十三年又四歲為成帝建始元年衡多收租入三歲矣此租穀千餘石即三歲中多收之數郡初上計簿時還之官至是乃復收之也以是推之列侯封戶雖有定數要以封

界之廣狹定租入之多寡不專以戶數為定也

司隸校尉駿少府忠行廷尉事劾奏衡 按公卿表衡

以建始三年十二月免相而張忠為少府在建始四

年不應有劾衡事衡免相時廷尉則何壽也

薛宣傳

壹关相樂師古曰关古笑字也 說文無笑字 徐鉉本增入

关亦不知所从當即芙蓉之芙說文娛从女芙聲女

子笑也莞爾之莞亦从艸明芙即古笑字矣漢隸从

竹从艸之字皆省作𦰇後人往往相亂如著作字當

从竹而反从艸笑語字當从艸而反从竹皆由隸省

而譌也隸書艸在上者或變爲兩點一畫故班史或作关亦有作咲者此卽从艸之證李陽水謂竹得風其體天屈如人之笑較之以竹鞭犬稍爲近理要皆臆造不可信

翟義傳

熙我念孺子師古曰熙歎辭 大誥熙作已已蓋熙之

省文

谷永傳

傳曰飢而不損茲謂泰厥災水厥咎亡師古曰洪範傳之辭 按五行志乃京房易傳之文非洪範傳文小

顏注誤也五行志厥咎牡亡此傳脫牡字

師丹傳

上於是追尊定陶共王爲共皇帝 帝字衍下文稱共皇者不一辭皆不云帝也詳見定陶王康傳

揚雄傳

百牙絕絃破琴 卽伯牙也古文伯百通用

贊曰雄之自序云爾 予謂自雄之自序云爾以下至篇終皆傳文非贊也司馬遷傳亦稱遷之自序云爾狀後別述遷事以終其篇與此正同遷有贊而雄無贊者篇中載桓譚及諸儒之言褒貶已見不必別爲

贊也此贊曰二字後人妄增非班史本文

儒林傳

擇掌故以補中二千石屬文學掌故補郡屬備員師古曰云備員者示以升擢之非藉其實用也按師古說非也平津本意以詔書爾雅浚厚非俗吏所解故選文學掌故補卒史所謂以儒術緣飾吏事也安得云不藉其實用乎備員蓋蒙上不足之文謂如有不足當以文學掌故充之毋使缺額耳中二千石屬即謂內史大行卒史郡屬即謂郡卒史劉攽謂卒史遷而爲屬亦非是

沛戴崇子平崇爲九卿

公卿表無崇名據張禹傳崇

蓋任少府也

喜因不肖仞仞古認字說文無認

唯京氏爲異黨焦延壽獨得隱士之說託之孟氏不相與同師古曰黨讀曰儻惠棟曰按文義當以黨字屬上句異黨猶言異類也

商善爲算著五行論歷四至九卿以公卿表攷之永

始三年詹事許商爲少府綏和元年又由侍中光祿大夫爲大司農其年又遷光祿勳當云三至九卿也又據溝洫志商嘗爲博士將作大匠河隄都尉皆在

未爲詹事以前

號其門人沛唐林子高爲德行平陵吳章偉君爲言語重泉王吉少音爲政事齊炗欽幼卿爲文學 班史書人名字例至精密它傳已見字者不更書唐林字子高已見鮑宣傳而又書者因三人而類及之也王式東平新桃人也 按地理志東平國無新桃縣後漢書光武紀龐萌蘇茂圍桃城注任城國有桃聚故城在今兗州任城縣北又劉永傳龐萌自號東平王屯桃鄉之北注桃鄉故城在今兗州龔邱縣西北此卽東平之新桃也

琅邪左咸咸爲郡守九卿 公卿表建平元年左咸爲大司農三年爲左馮翊元壽二年復由復土將軍爲大鴻臚元始五年又爲大鴻臚蓋四至九卿矣

循吏傳

九江以召父應詔書 信臣不書名非史例也蓋寬饒傳稱魏相爲魏侯鄭崇蕭育傳稱貢禹爲貢公敘傳稱桓譚爲桓生皆史家刊正未歸畫一

酷吏傳

南陽有梅免百政師古曰梅百皆姓也 百與伯通於是賜小史爵關內侯食遺鄉六百戶 漢制列侯大

者萬餘戶小者數百戶武帝時襄城侯桀龍四百戶
騏侯駒幾五百二十戶瞭侯畢取五百一十戶荻苴
侯韓陶五百四十戶邗侯李壽一百五十戶壽封戶
太少疑
有而圍小史得食六百戶是列侯封邑有時不如關
內侯之多也

僂輿出瘞寺門桓東如淳曰陳宋之俗言桓聲如和今
猶謂之和表師古曰卽華表也 桓和華聲皆相近

游俠傳

拜鎮戎大尹天水太守 按王莽改天水曰鎮戎太守
爲大尹旣云鎮戎大尹不當更云天水太守疑本注

文後人誤入正文

佞幸傳

鄧通蜀郡南安人也 地理志南安屬犍爲郡不屬蜀
郡犍爲武帝所置漢初蓋屬蜀也

韓嫣弟說亦愛幸以軍功封案道侯巫蠱時爲衛太子
所殺子增封龍雒侯雒當
作額大司馬車騎將軍自有傳

按說增父子已附韓王信傳說以愛幸故又牽連
書於嫣傳不必更及其子也

后姊嬀爲龍雒思侯夫人 雒當作額韓寶嗣父增爲

龍額侯諡曰思

朱詡子浮建武中貴顯至大司馬司空封侯 按後漢書浮爲大司空未嘗爲大司馬也豈以其嘗爲大司馬主簿相涉而誤歟

南粵傳

故濟北相韓千秋 李陵傳作濟南相

西域傳下

昆莫王號也名獵驕靡後書昆彌云師古曰昆莫本是王號而其人名獵驕靡故書云昆彌昆取昆莫彌取驕靡彌靡音有輕重耳蓋本一也 子謂小顏說非也昆彌卽昆莫彌莫聲相轉猶宛王毋寡一作毋鼓

鼓寡聲相轉其實一耳莫之爲彌譯音有輕重而名號未改非取王名之一字而沿以爲號也

焉耆國王治員渠城 員渠卽焉耆之轉與尉犁國王

治尉犁城危須國王治危須城初不異也

外戚傳上

孝惠張皇后 少帝恆山淮南濟川王皆以非孝惠子

誅 淮南當作淮陽

孝景王皇后 初皇太后微時所爲金王孫生女俗在

民間師古曰言隨俗而在閭巷未顯貴 子謂俗蓋

金氏女之名

孝武陳皇后 堂邑侯午薨生男須嗣侯 功臣表作

季須

史皇孫王夫人 封舅無故為平昌侯武為樂昌侯食

邑各六千戶 外戚侯表無故武皆六百戶

外戚傳下

孝成許皇后 五月庚子烏焚其巢太山之域 五行

志河平元年二月庚子泰山山桑谷有戴焚其巢此

作五月誤下文有三月四月可證

后姊平安剛侯夫人謁等 董教增曰表未見此侯惟

邛成家有安平侯王舜子章諡剛侯狀非平安也子

謂地理志干乘郡有平安侯國當是王舜所封若豫

章郡之安平侯國則長沙孝王子所封涿郡之安平

又非侯國也

孝成趙皇后 票騎將軍貪者錢不足計事 票騎將

軍謂曲陽侯王根也

於是免新成侯趙欽欽兄子成陽侯訢皆為庶人 按

外戚侯表成陽節侯趙臨以皇后父侯薨子訢嗣新

成侯欽以皇太后弟封建平元年皆坐弟昭儀絕繼

嗣免表以欽與訢皆為昭儀之兄傳以訢為欽兄子

必有一誤

孝平王皇后 迎皇后於安漢公第宮師古曰本是莽第以皇后在是因呼曰宮 董教增曰此當以第爲句宮字連下豐歆讀卽前文大司徒宮大司空豐光祿大夫歆三人也顏氏第宮之說失之遠矣

王莽傳上

前將軍何武後將軍公孫祿互相舉 按公卿表何武傳俱云祿爲左將軍此作後將軍誤也

王莽傳中

義陽東都曰六州 地理志雒陽莽曰宜陽卽此義陽也

其以益歲以南付新平新平故淮陽蘇林曰陳留圉縣莽改曰益歲 按地理志圉縣本屬淮陽不屬陳留豈莽時嘗改屬陳留乎圉縣莽曰益歲今地理志亦無之

昏以戊寅之旬爲忌日 莽以戊子代甲子爲六旬首戊寅旬中無子故忌之

王莽傳下

夙夜連率韓博 按地理志不夜縣莽曰夙夜此云連率則莽嘗置爲郡矣壽光縣莽曰翼平亭而此傳有翼平連率田況亦其類也

立安爲新遷王服虔曰遷音仙師古曰遷猶僂耳不勞
假借音 予謂遷之讀仙乃是古音律歷志少陰者
西方西遷也陰氣遷落物西遷聲相轉猶尙書大傳
云西方鮮方也莽稱紫閣圖文太一黃帝皆得瑞以
遷今本或作僂所謂新遷者乃太一新遷之後也諸遷字
皆作僂解故知服音爲是

直貨錢二十五 食貨志作貨泉錢卽泉字

會世祖與兄齊武王伯升 伯升光武之兄故字而不
名劉聖公光武所事也故亦稱字

迫措前隊醜虜 莽改南陽爲前隊所云醜虜指光武

兄弟也孟堅於王莽指斥之詞無所隱諱所以著莽
之惡於光武盛德初無損也

敘傳上

上於是引商丹入爲光祿大夫伯遷水衡都尉與兩師
竝侍中 按公卿表元延元年侍中光祿大夫趙彪
大伯爲侍中水衡都尉三年卒計其年正許商師丹
除侍中光祿大夫之時也伯爲水衡都尉表不應失
載疑趙彪卽班伯之譌

旣繫孿於世教矣 孿古戀字說文無戀

思有短褐之褻 短當作裋說文裋豎使布長襦貢禹

漢書卷之五十五 東漢書卷之五十五

文異

漢書二

廿五

貨殖傳竝有短褐不完之語

又況么磨尙不及數子鄭氏曰磨音麼小也晉灼曰此骨偏磨之磨也師古曰鄭音是也骨偏磨自音麻與此義不相合晉說失之 予按說文無麼字徐鉉等新附而有𦓐字𦓐痛病也與磨同么言其小磨言其病童謠所稱見一蹇人言欲上天隗囂少病蹇以是刺之也晉說得之

吹中龡爲庶幾兮師古曰吹古聿字 吹从日不从日

詩適求厥寧說文引作吹

敘傳下

泃泃紛紛 卽呂刑泃泃焚焚也泃泃聲相近詩緜緜

其庶韓詩作民民

六世耽耽其欲漑漑 易其欲逐逐子夏傳作攸攸蘇

林音攸爲迪迪逐聲相近

林音刈爲曲曲致禮林改

六世輝輝其海如如

是其海致致千夏軒并外外

其燕韓精并月月

面面餘餘

唱呂阡知知裝裝出而知韓林改精綿綿

漢書四

廿二史攷異九

錢大昕學

侯國攷

漢制列侯所食邑爲侯國西京侯者封戶有多少所食或盡一縣或止一鄉一亭皆以侯國稱之如陳平封陽武之戶牖鄉公孫丞相封高成之平津鄉匡衡封僮之樂安鄉師丹封厚邱之中鄉何武封不其之汜鄉所食不過一鄉皆別於縣而自爲侯國恩有降殺秩無尊卑也後漢始定爲都鄉侯鄉侯都亭侯亭侯之差於是侯而不爲國者矣高祖之世功臣侯者百五十餘人其

封邑所在班孟堅已不能言之武昭以後侯者班表始著其地亦有不備者蓋疑而闕之或轉寫脫去也地理志載侯國皆據當時見存者若中山之曲逆陳平所封清河之鄒欒布所封南陽之冠軍霍去病所封汝南之定陵淳于長所封丹陽之秣陵胡孰江都易王子所封魏之陰安濟北貞王子所封志皆不云侯國者其時國已除也攷哀平閒侯國志皆不書王子侯表堂鄉以下十一侯恩澤侯表殷紹嘉以下三侯皆成帝綏和以後所封而志亦不之及然則志所書侯國蓋終於成帝元延之末惟博山一侯或後人增加也志稱侯國二百四

十一今數之止百九十有四予證以諸表各標其始封姓名又補志之失注者二十五人後之讀班史者庶有取焉

河東郡

騏駒幾

東郡

陽平 王禁志失注

陳留郡

長羅 常惠

潁川郡

成安 郭忠

周承休 姬延年

汝南郡

陽城 劉德

安成 王崇

宜春 王訢

弋陽 任宮

歸德 先賢揮

安昌 張禹

安陽 王音

博陽 丙吉

成陽 趙臨

南陽郡

鄧 蕭何

博山 孔光

安衆 長沙定王子丹

春陵 長沙定王子買

新都 王莽

紅陽 王立

樂成 許延壽

博望 許舜

復陽 長沙頃王子延年

南郡

高成 長沙頃王子梁表作高城勃海亦有高城縣與長沙太遠志失注

江夏郡

鍾武 長沙頃王子度

廬江郡

松茲 六安共王子霸

九江郡

當塗 魏不害

博鄉 六安繆王子交

曲陽 王根

山陽郡

城都 王商 表作成都

爰戚 趙長年

中鄉 梁敬王子延年

鄭 梁敬王子罷軍

栗鄉 東平思王子護

西陽 東平思王子並 表在東萊

沛郡

廣戚 楚孝王子勳

黃 梁敬王子順 表在濟陰

郟成 王奉光封郟成侯宋郟曰 郟當作邛 表在濟陰

平樂 梁敬王子遷

留鄉 梁敬王子就 表在濟南

曲鄉 梁荒王子鳳 表在濟南

公邱 魯共王子順

浹 趙敬肅王子周舍

建平 杜延年 表在濟陽

扶陽 韋賢

高柴 梁敬王子發

平阿 王譚

臨都 梁敬王子未央 志失注

祁鄉 梁夷王子賢

漂陽 梁敬王子欽 志失注

東鄉 梁敬王子方 志失注

義成 甘延壽 志失注

魏郡

卽裴 趙敬肅王子道 表作擲裴在東海

平恩 許廣漢

邯鄲 趙敬肅王子仁

邯溝 趙頃王子偃 表作邯溝

鉅鹿郡

象氏 趙敬肅王子賀

新市 廣川繆王子志

安定 燕刺王子賢

歷鄉 廣川繆王子必勝

樂信 廣川繆王子彊

武陶 廣川繆王子朝

柏鄉 趙哀王子買

安鄉 趙哀王子喜

常山郡

桑中 趙頃王子廣漢

封斯 趙敬肅王子胡傷

樂陽 趙頃王子說

平臺 史元

都鄉 趙頃王子景
表在東海

清河郡

東陽 清河綱王子宏

信鄉 清河綱王子豹
表作新鄉

涿郡

廣望 中山靖王子忠

州鄉 河間獻王子禁

樊輿 中山靖王子修

成 中山康王子喜

良鄉 趙共王子交封
梁鄉侯或卽此

利鄉 中山頃王子安
表在常山

臨鄉 城陽頃王子雲
陽當作廣陽表誤

益昌 廣陽頃王子嬰

陽鄉 廣陽頃王子發

西鄉 廣陽頃王子容

阿武 河間獻王子豫

高郭 河間獻王子璡

新昌 燕刺王子慶

勃海郡

文選

漢書

五

定 齊孝王子越

參戶 河閒獻王子免

柳 齊孝王子陽己

臨樂 中山靖王子光

脩市 清河綱王子寅

景成 河閒獻王子雍

章鄉 鍾祖 表作童鄉

蒲領 清河綱王子祿

平原郡

平昌 王無故

羽 濟北式王子成

富平 張安世

合陽 梁喜

樓虛 訾順

龍頤 韓曾

安 濟北貞王子樂 表作安陽 姑日陽應作煬謚也

千乘郡

平安 王舜封安平侯即此史記將九名臣表本作平安漢表誤也

被陽 齊孝王子燕 繁安 齊孝王子忠

延鄉 李譚 志失注

濟南郡

朝陽 廣陵厲王子聖

獠 趙敬肅王子起

宜成 燕倉 表作宜城在濟陰

泰山郡

柴 齊孝王子代 志失注

寧陽 魯共王子恬

富陽 東平思王子萌 志失注

桃山 城陽孝王子欽

桃鄉 東平思王子宣

式 城陽荒王子憲 志失注

齊郡

廣菑川孝王子便

廣饒菑川靖王子國

北鄉菑川孝王子譚

平廣菑川孝王子服

臺鄉菑川孝王子眇

北海郡

劇魁菑川懿王子黑

瓠城陽頃王子息

劇菑川懿王子錯

平望菑川懿王子賞

平的菑川懿王子強

柳泉膠東戴王子疆

樂望膠東戴王子光

饒膠東康王子有成侯饒

平城膠東頃王子邑

密鄉膠東頃王子林

羊石膠東頃王子回

樂都膠東頃王子新

石鄉膠東頃王子理

上鄉膠東頃王子歛

新成膠東頃王子根

成鄉高密頃王子安

膠陽高密頃王子恁封膠東侯

東萊郡

平度菑川懿王子行

臨胸菑川懿王子奴

牟平齊孝王子濼

陽樂膠東頃王子獲封

徐鄉膠東共王子决

琅邪郡

虛水城陽頃王子禹

臨原菑川懿王子始昌

原史記
作臨原
餅 菑川靖王子成

雲 齊孝王子信

皋虞 膠東康王子建

茲鄉 城陽荒王子宏

高廣 城陽荒王子勳

柔 城陽荒王子山封棗
侯當即此字形相涉

麗 高密共王子賜封
麗茲侯當即此

伊鄉 城陽戴王子遷

高陽 薛宣

祓 城陽項王子霸
封挾侯當即此

零段 城陽項王子澤
志作虜葭

稻 齊孝王子定

魏其 膠東康王子昌

箕 城陽荒王子文

高鄉 城陽惠王子休

卽來 城陽荒王子佼

武鄉 高密項王子慶

新山 稱忠

昆山 城陽荒王子光

參封 城陽戴王子嗣

博石 城陽荒王子淵

慎鄉 表未見

安邱 高密項王子常

臨安 膠東共王子閔

東海郡

良成 魯安王子文德

南成 城陽共王子貞
表作南城

建鄉 魯項王子康

東安 魯孝王子彊

折泉 城陽荒王子根

房山 城陽荒王子勇

駟望 冷廣

高陵 翟方進

石山 城陽戴王子元

蘭祺 魯安王子臨朝
表作蘭旗

山鄉 魯孝王子綰

容邱 魯安王子方山

建陽 魯孝王子咸

于鄉 泗水勤王子定

平曲 廣陵厲王子會

都陽 城陽戴王子音

陰平 楚孝王子回

郟鄉 魯頃王子閔

武陽 史丹

新陽 魯頃王子永

建陵 魯孝王子遂

昌慮 魯孝王子宏
表在泰山

都平 城陽荒王子邱

臨淮郡

西平 于定國
志失注

高平 王逢時

開陵 成婉

昌陽 泗水戾王子霸

廣平 廣陵孝王子德

蘭陽 廣陵孝王子宜
封蘭陵侯即此

襄平 廣陽厲王子暨劉放曰
廣陽無厲王當是廣陵

樂陵 史高

豫章郡

海昏 昌邑哀王子賀
志失注

安平 長沙孝王子習
表在鉅鹿誤

桂陽郡

陽山 長沙孝王子宗

陰山 表未見

零陵郡

夫夷 長沙定王子義
志失注

都梁 長沙定王子定

泉陵 長沙定王子賢
表作衆陵誤

廣平國

南曲 清河綱王子遷
志失注

曲梁 平干頃王子敬
志在魏郡

廣鄉

平干項王子明表在鉅鹿志失注

平利

平干項王子世表在魏郡志失注

平鄉

平干項王子壬表在魏郡志失注

陽臺

平干項王子田封陽城侯即此

城鄉

平干項王子慶表作成鄉志失注

信都國

樂鄉

河間獻王子佟表在鉅鹿鄉誤卿

平隄

河間獻王子招表在鉅鹿

桃

廣川繆王子良表在鉅鹿志失注

西梁

廣川戴王子闢兵表在鉅鹿

昌成

廣川繆王子元

東昌

清河綱王子成

志未見者

利昌

代共王子嘉

懷昌

菑川懿王子高遂史記作壤

項陽

膠東項王子共

昌鄉

膠東項王子憲以三壽二年免

卑梁

高密項王子都

乘邱

東平王項疑即泰山之乘邱乘

誤字

樂昌

土武表在涉南

陵石

膠東共王子慶疑即東萊之陽石

問侯國例不屬諸侯王故王子而侯者必別屬漢郡

廣平信都亦諸侯王國也而得有侯國何故曰班志

郡國之名以元始二年戶口籍為斷其侯國之名則

以成帝元延之末為斷元延之世廣平信都皆郡也

非國也國已除為郡則從前之改屬它郡者復返其

舊迨哀帝建平中復置此二國則侯國必仍改屬它

郡特史家不能一一載之爾試觀廣平領縣十六而

戶止二萬七千有奇信都領縣十七而戶止六萬五
千有奇以附近郡國準之不應縣多而戶少乃爾蓋
改郡爲國之後未必仍領若干縣也

信都縣漢書地理志云信都縣漢書地理志云

信都縣漢書地理志云信都縣漢書地理志云

信都縣漢書地理志云信都縣漢書地理志云

信都縣漢書地理志云信都縣漢書地理志云

信都縣漢書地理志云信都縣漢書地理志云

信都縣漢書地理志云信都縣漢書地理志云

信都縣漢書地理志云信都縣漢書地理志云

信都縣漢書地理志云信都縣漢書地理志云

信都縣漢書地理志云信都縣漢書地理志云

信都縣漢書地理志云信都縣漢書地理志云

信都縣漢書地理志云信都縣漢書地理志云

信都縣漢書地理志云信都縣漢書地理志云

信都縣漢書地理志云信都縣漢書地理志云

信都縣漢書地理志云信都縣漢書地理志云

信都縣漢書地理志云信都縣漢書地理志云

書